

# পাগলা মহেশ্বর

শ্রীশৈলেন্দ্রনাথ সিংহ, বি. এ.

শ্রীগুরু লাইব্রেরী  
২০৪, কর্ণওয়ালিস ষ্ট্রীট, কলিকাতা

প্রকাশক—

শ্রীভুবনমোহন মজুমদার, বি. এম্-সি.

২০৪, কর্ণওয়ালিস ষ্ট্রীট, কলিকাতা।

দাম দশ আনা

বৈশাখ ১৩৪৮

প্রিণ্টার—শ্রীপঞ্চানন দাস  
সত্যনারায়ণ প্রেস,  
২৮।৪এ বিডন রো, কলিকাতা।

# পাগলা মহেশ্বর

এক

মহেশ্বর !—তুষ্টি—পাজি—ব'স্ বলছি ।—ব'স্, একুনি ব'স্ ।  
—বৈঠ্—বৈঠ্

ভোর হ'তে না হ'তে ছোট্ট মেয়ে বীণার কল-কণ্ঠের  
কথা কয়টি কানে যেতেই বোস্ সাহেবের ঘুম ভেঙ্গে গেল ।  
বিছানায় শুয়ে শুয়ে একটু উঁচু হয়ে বাংলোর জানালা দিয়ে  
তাকিয়ে দেখেন, বীণা তাঁর দাঁতাল হাতী মহেশ্বরের শুঁড় ধ'রে  
টেনে বসাতে চেষ্টা করছে । মহেশ্বর কিন্তু বেশ নির্বিকার ।

বীণার মা অণু ঘর থেকে মেয়ের এই কাণ্ড দেখছিলেন ।  
হাতীটা একটু বেয়াড়া হলেও বীণাকে কিছু বলে না । বোস্  
সাহেবের ঘরে এসে তিনি মেয়ের দিকে আঙ্গুল দিয়ে দেখিয়ে  
বললেন—

দেখেছ মেয়ের কাণ্ড ! কোন্ দিন হাতীতেই ওকে শেষ  
করে দেবে ।

বোস্ সাহেব বেশ নিশ্চিত্ত ভাবে জবাব দিলেন—

মহেশ্বরের কাছে অন্ততঃ ওর সে ভয় নেই । ওদের দু'জনের


খুব ভাব। অনেক সময় জন্ম-জানোয়ারের উপর মানুষের চেয়েও বেশী বিশ্বাস করা যায়।

বীণা এতক্ষণে মহেশ্বরের শুঁড়ের মধ্যে এক ভাল তেঁতুল গুঁজে দিল। মহেশ্বরও পরম তৃপ্তির সঙ্গে সেই তেঁতুলের ভাল তার প্রকাণ্ড হাঁর মধ্যে পুরে ফেলল। তখন তার ছোট ছোট সরষের মত চোখ দুটো আরও ছোট হয়ে গেল। এর পর বীণা মহেশ্বরের শুঁড়ে হাত বুলিয়ে কিছুক্ষণ আদর ক'রে দৌড়ে বাংলোয় ফিরে এল।

বীণার আয়া সকালে হাতমুখ ধুতে গেছে, এই ফাঁকে বীণা মহেশ্বরকে তেঁতুল খাইয়ে এল। হাতীরা তেঁতুল খেতে খুব ভালবাসে। বীণা তাই প্রায়ই এমনি ক'রে মহেশ্বরকে তেঁতুল খাওয়ায়—এই ভাবে ছোট্ট একটি শিশু এবং প্রকাণ্ড একটা দাঁতাল হাতীর মাঝে বেশ চেনা-পরিচয় হয়েছে।

বীণার বাবা বোস্ সাহেব আসামের জঙ্গল থেকে কাঠ চালান দেন। মস্ত কারবার। তাঁদের কোম্পানীর অনেক-গুলো হাতী। মহেশ্বর ছাড়া তাঁদের আরও একটা বড় দাঁতাল হাতী আছে। তার কথা পরে বলব।

মহেশ্বরের বয়স সবে পনেরো বছর। সে সাত হাত উঁচু—তার ওজনও প্রায় একশো মণ। এখন সে এত বড় হ'লেও এক সময় বাচ্ছা ছিল। পাঁচ বছর পর্যন্ত সে একেবারে ছাড়া থাকত। তখনও তার পায়ে শিকল পড়ে নি; মার আশে-পাশে চ'রে বেড়াত; ভয় পেলে দৌড়ে তার মার চার পায়ে



দুই—পাজি —ব'স্ বলছি ।— ব'স, একুনি ব'স্ ।—১ম পৃষ্ঠা

আড়ালে পালিয়ে থাকত। মাকে ছেড়ে বেশী দূর যেতে সাহসে কুলাত না। রাত হয়ে এলে চারিদিকের জঙ্গল বাঘ-ভালুকের ডাকে গম্-গম্ ক'রে উঠত, ভয়ে ভয়ে সে মার কোলের মধ্যে দাঁড়িয়ে দাঁড়িয়ে বাঘের গৌঁষ্ঠানি শুনত।

তিন বছর বয়সে ভিতরে ভিতরে সে একটু চঞ্চল হয়ে উঠে। মনে হ'ত কারখানার মানুষগুলোর চেয়ে তার গায়ের জোর বেশী হয়েছে। দুর্ফুঁমি ক'রে কখনও কখনও কোম্পানীর কুলী-মজুরদের তেড়ে যেত—তারাও ভয় পেয়ে পালাত—দেখে তার ভারী মজা লাগত। একদিন গৌয়ার্তুঁমি ক'রে বোস্ সাহেবকেই তেড়ে গিয়েছিল। তাঁর হাতে একটা ডাঙা ছিল, তাই দিয়ে তিনি মহেশ্বরের শুঁড়ে আচ্ছা এক ঘা কসিয়ে দিলেন। সেই থেকে সে আর কখনও ঐ থাকী হাফ-প্যান্ট-পরা, মাথায় টুপি, ডাঙা-ধারী মানুষটাকে তাড়া করে নি। কিন্তু মনে মনে বেশ রেগে রইল।

এমনি ক'রে মহেশ্বরের বাচ্ছা-বেলার ছেলেখেলা শেষ হতে-না হতে এল মানুষের দাসত্বে ভর্তি হবার শিক্ষানবিশীর পালা। সে দুঃখের কথা সে কোন দিনই ভুলবে না।

এক পাল লোক হৈ হৈ ক'রে দড়ির ফাঁস ছুড়ে তার পা চারটে জড়িয়ে ফেলল। প্রথমটা সে বাঁধন ছিঁড়ে ফেলবার জন্যে ধবস্তাধবস্তি করল—কুলীদের জনকয়েককে তাড়া করেও গিয়েছিল। কিন্তু, শেষ পর্যন্ত তাকে বাঁধা পড়তেই হ'ল—একটা বাচ্ছা হাতীকে কাবু করবার জন্যে লোকজন, দড়া-দড়ির প্রচুর

আয়োজন হয়েছিল। নিজে বোস সাহেব উপস্থিত থেকে সমস্ত তদারক করছিলেন।

এত আয়োজনের কারণ, তাকে প্রথম থেকেই ভাল ক'রে বুঝিয়ে দিতে হবে যে, মানুষ যে-সে জীব নয়, তার কাছে জোর খাটবে না। মানুষকে তার ভয় ক'রে চলতে হবে—এই ভয় থেকেই তার দাস-জীবনের বর্ণপরিচয়।

মহেশ্বর একবার তার মার দিকে কাতর দৃষ্টিতে চেয়ে দেখল, তারপর মানুষের শিশু ভয় পেয়ে যেমন ক'রে “মা-গো!—” ব'লে চীৎকার করে, তেমনি ক'রে চেষ্টা করে উঠল। কিন্তু তার মা-ই বা কি করবে, আগে থেকে তাকে আচ্ছা ক'রে শিকল দিয়ে বেঁধে রাখা হয়েছিল। অসহায় সন্তানের বিপদে তার কিছুই করবার উপায় ছিল না। বারকয়েক চীৎকার ক'রে সে শুধু তার নিরুপায় অবস্থার কথা জানিয়ে দিল। মহেশ্বর গায়ের জোরে বাঁধন ছিঁড়তে প্রাণপণ চেষ্টা করতে লাগল।

চারটে পায়েই আলাদা আলাদা ক'রে শিকল পড়ল। অনেকগুলো ক'রে লোকে এই এক-একটা শিকল ধ'রে, একটু একটু ক'রে টেনে এনে শিকল চারটে মোটা মোটা গাছের সঙ্গে বেঁধে রেখে দিল। এর পরে, তার কাছে কিছু খাবার জিনিস আর জল রেখে, সে-দিনের মত লোকজন সব চলে গেল।

দিন গেল,—রাত এল। রাত্রে মা-ছাড়া সে কখনও থাকে নি। চারিদিক অন্ধকার, রাত-চরা জন্তু-জানোয়ারের রকম-

বেরকম শক্তি ক্রমে স্পর্শ হয়ে উঠল। সমস্ত দিনের ধ্বস্তাধ্বস্তিতে শরীর ক্লান্ত। একে অনাহার, আবার মাও কাছে নেই; একটু ভয়-ভয়ও করছিল তার।

খানিকক্ষণ চুপচাপ থেকে আবার সে শিকল ছিঁড়বার জন্যে মরিবাঁচি ক'রে টানাটানি করতে লাগল। যে রকম শক্তি শিকল দিয়ে বাঁধা তা' তার কেন, তার মারও ছিঁড়বার ক্ষমতা ছিল না। নিষ্ফল রাগের উন্মত্ত গর্জ্জন শেষে অসহায় শিশুর আর্তনাদে পরিণত হ'ল। অন্ধকার বনের আর এক প্রান্ত থেকে সে আর্তনাদের প্রতিধ্বনি ফিরে আসতে লাগল—মা ওবুও কাছে এল না।

পরদিন সকাল হতেই বোস্ সাহেব মহেশ্বরকে দেখতে এলেন। খাবার জিনিস যা তার কাছে রেখে যাওয়া হয়েছিল, তার কিছুই সে ছোঁয়নি। আধ-মরার মত ধুঁকছে, আর ভাঙ্গা-গলায় মাঝে মাঝে চোঁচাচ্ছে। বোস্ সাহেব টাটকা ঘাস, আখ, তেঁতুলের তাল সঙ্গে এনেছিলেন। শুঁড়ের কাছে এগিয়ে দিলেন—মহেশ্বর খেল না। খিদে যথেষ্ট থাকলেও রাগে দুঃখে তার খাওয়ার ইচ্ছেই ছিল না।

আরও একদিন এইভাবে কাটল। সে আরও দুর্বল হয়ে পড়ল। বোস্ সাহেবের ভাবনা হ'ল, বেয়াড়া বাচ্ছাটাকে হয়ত পোষ মানানো যাবে না। এমন সুন্দর বাচ্ছাটি পোষ মানানোর চেষ্টায় হয়ত মরেই যাবে।

এ দিন এসে তিনি একটা পাত্রে খানিকটা টিনের ঘন দুধ



জলের সঙ্গে মিশিয়ে তার কাছে রেখে গেলেন। তিনি চলে গেলে, মহেশ্বরের শুঁড়টা অগ্ৰমনক ভাবে দুধের পাত্রের দিকে এগিয়ে এল। পিপাসা পেয়েছিল খুব—এক চুমুক দুধ শুঁড় দিয়ে চুষে নিল—তারপর আস্তে আস্তে মুখের মধ্যে ঢেলে দিল। খেতে বেশ লাগল। আরও এক চুমুক—শেষে সমস্ত দুধটাই খেয়ে ফেলল।

দুধটা খেয়েছে দেখে বোস্ সাহেব খুশী হলেন। - তা হ'লে বাচ্ছাটাকে পোষ মানানো যাবে, বোধ হচ্ছে। পরক্ষণেই কিন্তু মহেশ্বরের কাতর-করুণ চোখের দিকে চেয়ে তাঁর ধারণা বদলে গেল। তার সমস্ত আকৃতি-প্রকৃতি বলে দিচ্ছিল যে, সে শরীরে ও মনে খুবই ভেঙ্গে পড়েছে।

বাচ্ছা হাতীর শরীর ভেঙ্গে পড়লে তত ভয়ের কথা নয়—রীতিমত খাওয়া-দাওয়া পোলে সেরে ওঠে। কিন্তু, মন ভেঙ্গে গেলে বাঁচান শক্ত। তক্ষুনি তিনি মহেশ্বরের শিকল খুলে দিতে বললেন। চার পায়ের শিকল খুলে দিয়ে সামনের দুই পায়ে বেড়ি-শিকল লাগিয়ে ছেড়ে দেওয়া হ'ল—যাতে সে ছুটতে না পারলেও কাছাকাছি যায়গায় ইচ্ছেমত চ'রে খেতে পারে।

সঙ্গে সঙ্গে মহেশ্বরের চিকিৎসার ব্যবস্থাও হল। এখানকার জঙ্গলে হাতীর বৈজ্ঞ পাওয়া যায়। তারা জংলী লোক, খাবার জ্বিনিসের সঙ্গে নানা রকম গাছ গাছড়া খাইয়ে চিকিৎসা করে। সে চিকিৎসায় বেশ ফলও হয়।

## দুই

বোস্ সাহেবের বক্শিসের লোভে, ঐ অঞ্চলের একজন নামকরা হাতীর বৈজ্ঞ খুব যত্ন ক'রে তার চিকিৎসা আরম্ভ করল। ভাল ভাল খাবারের সঙ্গে এ-গাছের শিকড় ও গাছের ছাল খাওয়াতে খাওয়াতে মহেশ্বরের চেহারা একটু একটু ক'রে ফিরতে লাগল—কয়েক মাসের মধ্যেই সে বেশ সুস্থ ও সবল হয়ে উঠল।

সুস্থ হবার সঙ্গে সঙ্গে তার মাল্হত মংলা, তাকে একটু একটু ক'রে মানুষের চাকরি করা শেখাতে শুরু করলে। মংলা তার মাথার উপর ডাঙ্গস্টা কখনও আনত, কখনও একটু জোরে চেপে ধরে। মহেশ্বর ডাঙ্গসের খোঁচা এড়ানর জন্যে ভয়ে ভয়ে মাথা নীচু করে। মহেশ্বর মাল্হতের ছকুমে পিছনের পা দু'টো গুটিয়ে বসতে শিখল।—চলতে বললে চলে, থামতে বললে থামে। পিঠের উপর হালকা হালকা হাওদা বেঁধে দিলেও আপত্তি করে না। সে জানে, আপত্তি করলেই ডাঙ্গসের খোঁচা খেতে হবে।

প্রথমে ছোট হালকা হাওদা, ক্রমে ভারি বড় হাওদা তার পিঠে উঠল। দশ বছর বয়সে সে কোম্পানীর আর-সব সমান বয়সী হাতীর তুলনায় বেশ বড়ই দেখতে হ'ল।



মহেশ্বরের দাঁত দুটো বাঘের পাঁজরায় বাঁধে গেল।—১০ পৃষ্ঠা

এই সময়, এই বাচ্ছা বয়সেই সে একটা বাঘ মেরে ছিল। যখন সে আরও ছোট ছিল, বাঘ দেখলে ভয় পেত,—প্রকাণ্ড চারটে থামের মত মার পায়ের মাঝখানে পালিয়ে যেত। তার মাকে সে কখনও বাঘ মারতে দেখে নি। তা' হ'লেও সে বড় হয়ে কেমন ক'রে যেন নিজেথেকে বুঝতে পারল ঐ হলুদে ডোরাদার বাঘ নামের প্রকাণ্ড বেড়াল সে মারতে পারে, যেন বাঘ মারতে পারা তার জাতের স্বভাব।

রাতের বেলায় তার সামনের দুই পায়ে বেড়ি-শিকল লাগিয়ে রাখাছিল। বাঘটা পিছন দিক থেকে লাফ দিয়ে উঠে পড়েছিল পিঠের উপর। ধারালো নখ-দাঁতের আঁচড়-কামড়ে তার সমস্ত শরীর যখন জ্বালা করে উঠল তখন সে প্রাণপণে গা-ঝাড়া দিয়ে বাঘকে মাটিতে ফেলে দিল। কিন্তু বাঘ তখনি দাঁড়িয়ে উঠে মহেশ্বরের সামনের পা বেয়ে কাঁধ পর্যন্ত উঠে গেল। তার কান আঁকড়ে ধ'রে মুখের পাশে মস্ত মস্ত নখ বিঁধিয়ে দিল। বেচারী মহেশ্বর এবার সত্যিই কাবু হয়ে পড়ল। সে-যাত্রায় বাঘ তাকে হয়ত মেরেই ফেলত, কিন্তু মহেশ্বরের কপাল-জোরে অবস্থাটা পাল্টে গেল।

মহেশ্বরের সামনের দুই পায়ে বেড়ি-শিকল বাঁধা ছিল। সেই অবস্থায় সে যন্ত্রণায় অস্থির হয়ে, পা যে তার শিকল দিয়ে বাঁধা সে কথা ভুলে, বে-পরোয়া ছুট দিতে চেষ্টা করল, কিন্তু সামলাতে না পেরে ডিগবাজি খেয়ে পড়ল একেবারে বাঘের উপর চেপে। আর সেই হুমড়ি-খেয়ে পড়ার সঙ্গে সঙ্গে মহেশ্বরের দাঁত

দুটো বাঘের পাঁজরায় বিঁধে গেল। এবার মহেশ্বরের পালা। সে রাগের চোটে বাঘটাকে দুই পা দিয়ে মাড়িয়ে মাড়িয়ে এমন খেঁতলে মাটির সঙ্গে সমান ক'রে দিল যে, তাকে আর তখন বাঘ ব'লে চিনবার জো থাকল না।

পরের দিন সকালে বোস্ সাহেব মহেশ্বরকে দেখতে এসে দেখেন এই কাণ্ড। বাঘ ত' মরেছে। কিন্তু, মহেশ্বরের সমস্ত গায়ে যে আঁচড়-কামড় দিয়েছে সেইগুলোই এখন তাঁর ভাবনার কথা; কেন না, বাঘে যে সমস্ত জন্তু জানোয়ার মেরে খায়, তাদের রক্ত মাংস বাঘের দাঁতে নখে কিছু কিছু লেগে থাকে। সেই রক্ত-মাংস পচে, তাতে নানা রকমের বিষাক্ত জীবাণু জন্মায়। হিংস্র জন্তুর আঁচড়-কামড়ের ঘা এই জন্তু প্রায়ই বিষয়ে যায়।

মহেশ্বরের চিকিৎসার জন্তে আবার বৈদ্য ডাকা হ'ল। গাছ-গাছড়া দিয়ে সিদ্ধ জলে রোজ ঘা ধোয়ানো চলতে লাগল—ঘায়ের উপর মাছি না বসতে পারে তার জন্তে কত রকম প্রলেপ দেওয়া হল। দু' মাস ধ'রে যত্ন-তদ্বিরের ফলে, আর বৈদ্য ম'শায়ের গাছ-গাছড়া জড়ি-বুটির গুণে ঘা শুকিয়ে গেল। তবু সম্পূর্ণ সুস্থ হ'তে মহেশ্বরের আরও এক মাস লেগেছিল।

## তিন

বোস্ সাহেবের আরও একটা মস্ত দাঁতাল হাতী ছিল, তার নাম ভৈরব—সে একটা দুর্দান্ত গুণ্ডা। প্রায়ই তার মেজাজ খারাপ হয়। তখন সে যাকে সামনে পায় তাকেই ঘায়েল করে। এই সময় তাকে মোটা শিকল দিয়ে বেঁধে রাখতে হয়।

বাচ্ছা বয়সে মহেশ্বর একবার এই ভৈরবের পাল্লায় পড়েছিল। কারখানার কুলী-মজুররা নিকটে না থাকলে মহেশ্বরকে সে হয়ত মেরেই ফেলত। সেই থেকে মহেশ্বর আর ভৈরবে রেশারেশি চলেছে—কেউ কাউকে বরদাস্ত করতে পারে না। বাচ্ছা মহেশ্বর ভাবে বড় হয়ে সে ভৈরবের উপর শোধ তুলবে।

বয়স্ যখন উনিশ, সেই সময় মহেশ্বরের জীবনে একটা ঘটনা ঘটে—সেই থেকে তার মনটা ভিতরে ভিতরে স্বাধীন হবার জন্যে পাগল হয়ে ওঠে। রাতে সে যেখানে বাঁধা ছিল—তারই খানিকটা দূর দিয়ে একটা বুনো হাতীর দল চলে গেল। দিবিব আরামে চ'রে বেড়াচ্ছে। একটু একটু ক'রে সমস্ত দলটাই শেষে বনের মধ্যে অদৃশ্য হয়ে গেল। মহেশ্বর তাদের দিকে তাকিয়ে তাকিয়ে দেখল। দেখতে দেখতে মনটা কেমন এক রকম হয়ে গেল। এরা ত' তারই জাত ভাই। কেমন স্বাধীন! পারে শিকল নেই, মাথার উপর মালুত নেই—মানুষের চাকর নয়।—একদিন

সেও ওদেরই মত স্বাধীন হবে। মানুষের চাকরি তার মোটেই ভাল লাগে না।

এই ঘটনার পর থেকে একদিকে তার ভিতরকার প্রকৃতি তাকে স্বাধীন হওয়ার জন্মে নাড়া-চাড়া দিতে লাগল, আর এক দিকে মানুষ-জন্তুর উপর রাগও তার বেড়ে চলল। সে ভাবে কোম্পানীর সমস্ত মানুষগুলোকে একদিন মেরে ফেলবে—তার পর বনে চ'লে যাবে। সেখানে সে নিজের ইচ্ছে মত চ'রে বেড়াবে। মানুষ কি ভয়ানক জন্তু—একটু বেয়াড়া হলেই মাহুত তাকে কি জোরে ডাঙ্গস লাগায় !

দিনের বেলায় খাটা-খাটুনি। ছে-দেওয়া মোটা মোটা গাছ গড়িয়ে এনে কারখানা-জাত করে—আর রাতের বেলায় বেড়ি পরে এদিক ওদিক চ'রে খায়। ছাব্বিশ বছর বয়স। যেমন প্রকাণ্ড তার চেহারা তেমনি অসম্ভব গায়ের জোর। দশটা হাতী যে কাজ ক'রে উঠতে পারে না, একা মহেশ্বর অনায়াসে তা ক'রে থাকে। তবে এক দোষ ভৈরবকে দেখলে সে একেবারে ক্ষেপে যায়। বোস সাহেব হুকুম দিয়েছেন মহেশ্বর আর ভৈরবকে কখনও যেন কাছাকাছি রাখা না হয়।

এই সময় মহেশ্বরকে কেনবার জন্মে খদের জুঠেছিল। বোস সাহেব বিক্রী করেন নি। তাঁর কাঠের কারখানার ক্রোশ দুই দূরে এক পশ্চিমা কেঁইয়ার ধানের কারবার। কারবারের মালিক নাথুরাম একে কিনতে চেয়েছিল। কিন্তু বোস সাহেব কিছুতেই মহেশ্বরকে বিক্রী করতে রাজি হন নি। ছোট থেকে সে তাঁরই



হাতে বড় হয়েছে। মহেশ্বরের উপর তাঁর একটা মায়ী প'ড়ে গেছে। তা ছাড়া মহেশ্বরের মত এত বড় দাঁতাল হাতী সাধারণতঃ দেখা যায় না।—এমন হাতী কি কেউ সামান্য টাকার লোভে অণ্ডের হাতে দেয় !

নাথুরাম বোঝে কিসে টাকা হয়। টাকা রোজগারের জন্তে নিজের দেশ ছেড়ে আসামের জঙ্গলে কারবার করতে এসেছে। হাতীটা যদি কিনে রাখতে পারে দু-পাঁচ বছর পরে বেশ মোটা লাভে বিক্রী করা যাবে। বোস্ সাহেব মহেশ্বরকে বিক্রী করলেন না। নাথুরাম সেই থেকে মতলবে আছে যে, কোনও রকমে বোস্ সাহেবকে জব্দ করবে। লোক লাগিয়ে মহেশ্বরকে এমন যত্ন ক'রে দেবে যে, কেউ আর তাকে কানাকড়ি দিয়েও কিনতে চাইবে না।

নাথুরাম বোস্ সাহেবকে জব্দ করবার এক অদ্ভুত ফন্দী এঁটে, মহেশ্বরের মাহুত মংলাকে গোপনে ডেকে পাঠাল।—এ লোকটাও খুব দুষ্কু।

মংলা এসে সেলাম ক'রে দাঁড়ালে নাথুরাম তাকে জিজ্ঞাসা করল, সে বোস্ সাহেবের কাছে কত টাকা মাইনে পায়।

মংলা বলল—পনেরো, শেঠজি।

শেঠজি, অর্থাৎ নাথুরাম আশ্চর্য হবার ভাব দেখিয়ে বলল—নাত্র পনেরো ! তা' এই পনেরো টাকায় তোমার কি ক'রে চলে ?

মংলা, মাইনে সম্বন্ধে বোস্ সাহেবের অবিচার, নিজের দক্ষতা এবং সেই সঙ্গে অভাব অভিযোগের একটা লম্বা ফর্দ দিতে



যাচ্ছে, এর মধ্যে নাথুরাম বলল—তোমার মত পাকা মাহুত, বিশ টাকা কেন পঁচিশ টাকা দিয়েও পাওয়া কঠিন।

মংলা যে পাকা মাহুত, নিজে বোস সাহেবও সেকথা স্বীকার করে থাকেন। কিন্তু তাই ব'লে পনেরো টাকার জায়গায় একলাফে পঁচিশ টাকা মাইনে হ'তে পারে, এরকম কথা শুনে তার মনটা বেশ গলে গেল। কিন্তু সেও চালাক কম নয়—সঙ্গে সঙ্গে এটাও মনে হ'ল এভাবে কথা বলার নিশ্চয়ই কোন উদ্দেশ্য আছে। তা না থাকলে ছাতুখোর কেঁইয়া খামখা এত দরদ দেখাতে যাবে কেন।

মংলা কোন কথা বলছে না দেখে, নাথুরাম বলল—মণিপুরের এলাকায় সে হাতী কেনা-বেচার কাজ আরম্ভ করবে, মংলা যদি রাজি হয়, তা হ'লে এখনই তাকে পঁচিশ টাকা মাহিনের কাজে ভর্তি করতে পারে।

মংলা সহজেই রাজি হ'ল। নাথুরাম এইবার তাকে আসল কথা ভেসে বলল। কথাটা এই—

বোস সাহেবের কাজ ছেড়ে দিয়ে, নাথুরামের চাকরিতে ভর্তি হ'লে এখনই সে পঁচিশ টাকা করে মাইনে পাবে। তবে তার আগে তাকে একটা কাজ করতে হবে। কাজটা এমন কিছু কঠিন নয়। মহেশ্বরের দাঁত দুটো কেটে আনতে হবে। বন্দোবস্ত যা কিছু করা দরকার নাথুরাম করে দেবে। একটু হুঁশিয়ার হয়ে কাজ করলেই ধরা পড়ার কোন ভয় নেই। মতলবটা এই—

বিকেলের দিকে মহেশ্বরের স্নান হয়ে গেলে, মংলা তাকে কারখানার বাংলো থেকে খানিক দূরে শিকল পরিয়ে রাখবে। তারপর বেশ অন্ধকার হয়ে এলে নাথুরাম দু'জন লোক পাঠিয়ে দেবে। তাদের কাছে ভাল ধারাল করাত থাকবে। দাঁত অবশ্য মংলাকেই কাটতে হবে। সে ছাড়া আর কেউ ও-হাতীর কাছে ঘেসতে পারবে না। দাঁত কাটা হয়ে গেলেই নাথুরামের লোক দাঁত নিয়ে জঙ্গলের মাঝে কোনও একটা গাছের কাছে মাটিতে পুঁতে রেখে দেবে।

ওজর আপত্তি দর-কসাকসি হ'ল অনেক। তবে টাকার জোরে না-হয় এমন কোন্ অপকর্ম আছে? টাকার লোভে মংলা শেষে রাজি হ'ল। এর জন্মে তাকে বকশিস করতে হবে পুরো একশো টাকা। নাথুরাম সেই দিনই তাকে পঞ্চাশ টাকা আগাম দিল—বাকী টাকা কাজ হাসিল হলে পাবে। এ ছাড়া পঁচিশ টাকা মাইনের নতুন চাকরিটা ত' আছেই।

এইবার বোস্ সাহেব খুব জব্দ হবেন ভেবে নাথুরামের মনে ফুর্তি আর ধরে না। দাঁত কেটে নিলে মহেশ্বর একেবারে অকেজো হয়ে যাবে। তারপর দুই-এক বছর কেটে গেলে, সমস্ত ব্যাপারটা যখন চাপা প'ড়ে যাবে, মাটির নীচে থেকে দাঁত দুটো তুলে এনে মোটা দামেই বিক্রী হবে।

পুরুষ হাতী বড় হবার সঙ্গে সঙ্গে শুঁড়ের দুই পাশের দুটো “ছেদ-দস্ত” বড় হতে থাকে। এই দাঁতকে আমরা গজদস্ত বলি। দাঁত যত বড় হয় তার দামও তত বেশী

হয়। দাঁতাল হাতী তার দাঁতের জন্যে কেবল যে দেখতেই সুন্দর হয় তা নয়, এই দাঁতের জোরে সে অনেক-কিছু কাজও করে থাকে।

হাতীর আর একটা অদ্ভুত জিনিস তার শুঁড়। হাত এবং নাক এক সঙ্গে মিলিয়ে যেন এই শুঁড় তৈরী হয়েছে! শুঁড়ের আগায় দুটো ছেঁদা আছে, তাই দিয়ে নিঃশ্বাস নেয়। আর শুঁড় দিয়ে না করতে পারে এমন কাজ নেই। জোরের কাজ ত করতে পারেই—একটা ছোট ছুঁচ পর্য্যন্ত মাটি থেকে খুঁটে তুলতে পারে।

## চার

বেলা প'ড়ে এসেছে। বিকেল হ'তে আর দেবী নেই। বাংলোর বারান্দার ঈজি চেয়ারে শুয়ে বীণা দূরে জঙ্গলের দিকে তাকিয়ে দেখছে। দেখতে দেখতে, অন্তমনস্ক হয়ে, চেয়ার ছেড়ে বারান্দার রেলিং ধ'রে এসে দাঁড়াল। কি মনে হ'ল—মাথায় একটা টুপি চাপিয়ে আশু আশু নেমে, সামনের উঠোন পার হ'য়ে এগিয়ে চলল।

মাঝে মাঝে সে এই রকম বাইরে বেরিয়ে যায়। কারখানার চারিদিকেই লোকজন এবং কুলী মজুরদের বস্তু। এক মাইল দেড় মাইলের মধ্যে দিনের বেলায় হিংস্র জন্তুর ভয়ও নেই। তা' হ'লেও বোস সাহেব ব'লে দিয়েছেন বীণা যখন বাংলা থেকে বাইরে যাবে, চারজন কুলী যেন তার সঙ্গে থাকে।

আজ সে কাউকে সঙ্গে না নিয়েই চুপি চুপি বেরিয়ে গেল—এই ভেবে যে, একুনি ফিরে আসবে। হাঁটতে হাঁটতে বাংলা ছাড়িয়ে খোলা মাঠের কাছে এল। মাঠের আর এক ধারে মোটা শেগুন গাছের সঙ্গে পাগুলা হাতী ভৈরব বাঁধা ছিল—ক'দিন থেকে তার মেজাজ-খারাপ চলছে। বীণা মহেশ্বরকে যেমন ভালবাসে ভৈরবকে তেমনি ভয় করে।

আগের দিন তার বাবার কাছে শুনেছে ভৈরব কেপে আছে। শিকল দিয়ে বাঁধা ছিল, ভয়ের কোন কারণ ছিল না, তবুও মার্টের যে দিক্টায় সে বাঁধা ছিল, সে দিকে না গিয়ে বীণা অন্য দিকে এগিয়ে চলল। মাঝে মাঝে ভৈরবের গুরু-গম্ভীর হুঙ্কার কানে আসছিল, তাই শুনে বীণার কেমন ভয়-ভয় করছিল।

অনেকক্ষণ সে এইভাবে এগিয়ে গেল। হলুদে পাখী, মাছরাঙ্গা, বনটিয়ে, ফিল্ডে—কত রকম পাখী, তাদের যে কত রকম-বেরকম ডাক! চমৎকার লাগছে। শুকনো পাতা ঝরে পড়ার সর্-সর্ শব্দ, মাথার উপর গাছের ডালে বাঁদরের কিচির-মিচির, এই সমস্ত শব্দে শুন্তে শুন্তে ভৈরবের ভয় কোন্ সময় মিলিয়ে গেল। বীণা আরও এগিয়ে চলল।

ফেরবার কথা যখন মনে হ'ল তখন রোদ বেশ প'ড়ে এসেছে—গরম কিন্তু তেমন কমে নি, কেমন যেন গুমোট ধম্ধমে ভাব—ঝড় উঠবে হয়ত। গরম কালে ঝড় ওঠবার আগে সাধারণতঃ এই রকম হয়। মোটের উপর আকাশের গাভিক ভাল নয়।

শিকলের বামর্-বামর্ শব্দ শোনা যাচ্ছিল। নিকটে বোধ হয় পোষা হাতী চ'রে বেড়াচ্ছে। বীণা ভাবল, মহেশ্বরকে যদি পাওয়া যায় ত বেশ হয়,—তার পিঠে চেপে তাড়াতাড়ি বাংলোর পৌঁছে যাওয়া যায়। আরও খানিকটা এগিয়ে দেখল—কতকগুলো কোম্পানীর হাতী চলেছে—কিন্তু মহেশ্বর সেখানে নেই।

দেখতে দেখতে অন্ধকার ক'রে বাড় উঠল। আকাশের কড়-কড় শব্দে বাজ পড়ার সঙ্গে সঙ্গে বাড় উঠল। প্রকাণ্ড প্রকাণ্ড গাছের মাথায় মাথায় বাড়ের গোঁ-গোঁ শব্দ শোনা যেতে লাগল। মোটা মোটা বৃষ্টির ফোঁটা বীণার গায়ের উপর পড়ছে। এইবার সে দৌড়তে আরম্ভ করল। একটা বড় গাছের ডাল মড়মড় ক'রে ভেঙ্গে পড়ল—বীণা আর একটা গাছের গুঁড়ির পিছনে ছুটে গেল।

সে ছুটেছে—বড়বৃষ্টি অন্ধকার এক সঙ্গে ঘনিয়ে এসেছে— তাড়াতাড়ি বাংলায় না পৌঁছতে পারলে বিপদের কথা। দৌড়তে দৌড়তে একটা মোড় ঘুরতেই দেখল একটু দূরেই একটা দাঁতাল হাতী—কি সর্বনাশ!—এ ত মহেশ্বর নয়— ভৈরব! যে গাছের সঙ্গে তার শিকল বাঁধা ছিল, সে গাছটা উপড়ে পড়েছে। ভৈরব ছাড়া পেয়ে রুখে চলেছে। যদি তাকে ভেড়ে আসে! বীণা আর ভাবতে পারল না—ভয়ে হাত-পা অবশ হয়ে আসছে। তবুও সে ভৈরবকে এড়িয়ে একে-বেঁকে ছুটতে লাগল। ভৈরব বীণাকে দেখতে পেয়েছিল, সে পায়ের শিকল টানতে টানতে বীণাকে তাড়া করে এল।

এঁকে-বেঁকে দৌড়ে, কখনও গাছের আড়াল দিয়ে ঘুরে বীণাও ছুটল—তার সমস্ত শরীর কাঁটা গাছে ছ'ড়ে যাচ্ছে।

শরীরের তুলনায় হাতীর ঘাড় ও চোখ ছোট। তাই তার সমস্ত শরীর না ঘুরিয়ে সে ঘাড় ফেরাতে পারে না। এই জন্মে সামনে ছাড়া আশে-পাশে এরা ভাল ক'রে দেখতে পায়





বাঁগা পানাচ্ছে—ভেঁবব তাকে তাজা ক'রে চলছে। ২২ পৃষ্ঠা

না। চোখেও কম দেখে। কিন্তু চোখে কম দেখতে পেলেও শত্রুর গন্ধ পায়। বাতাস-চলার এক মাইল দেড় মাইল তফাতের শত্রুকেও এরা বুঝতে পারে। চলতে চলতে সন্দেহ হ'লে শুঁড় উঁচু ক'রে বার বার বাতাস শুঁকতে থাকে। সেই জন্মে হাতীর দিক থেকে বাতাস চলতে থাকলে সে বাতাস শুঁকে এরা কিছু বুঝতে পারে না।

বীণা পালাচ্ছে—ভৈরব তাকে তাড়া ক'রে চলেছে। এই ভাবে কতক্ষণ কেটে গেল। বীণা একটা পথ দেখতে পেল। যে পথ ধ'রে সে ছুটছিল, এ পথটা তার চেয়ে পরিষ্কার। গাছের উপর সে উঠতে পারত। কিন্তু যেমন-তেমন গাছে উঠলে রন্ধে পাওয়া ত যাবেই না—বরং বিগাদ ঘটতে পারে। গোটা গাছটাই হয়ত দাঁত দিয়ে উপড়ে ফেলবে, না হয় শুঁড় জড়িয়ে ভেঙ্গে ফেলবে। ছুটতে ছুটতে সামলাতে না পেরে একটা গাছের সঙ্গে ধাক্কা খেয়ে বীণা পড়ে গেল—আর বুঝি রন্ধে নেই—ভৈরব তাকে ধরে ফেলল ব'লে!

যে গাছে ধাক্কা খেয়ে সে পড়ে গেল, তারই কাছে আবছায়া অন্ধকারে দাঁড়িয়ে ছিল মহেশ্বর। সে চুপ ক'রে দাঁড়িয়ে আছে—শুঁড় মাথার উপর উঁচু ক'রে তুলে। প্রকাণ্ড দেহের সমস্তটা দিয়ে সে শত্রুর গন্ধ পাচ্ছে। এ গন্ধ সে ভাল ক'রে চেনে—তার ছেলেবেলা থেকে মহাশত্রু ভৈরবের।

মহেশ্বরকে দেখতে পেয়ে বীণা তাকে অনেক ক'রে কাছে ডাকতে লাগল। মহেশ্বর সে কথা কানেও নিল না। বীণার



মনে হ'ল সে তাকে দেখতে পায়নি। সাহস ক'রে বীণা মহেশ্বরের দিকে এগিয়ে গেল—সে তবুও বীণার দিকে তাকাল না। শুঁড় আরও উঁচু ক'রে গর্গর্ ক'রে উঠল। গস্তীর চাপা গর্জনে পায়ের নীচের মাটি পর্যন্ত কেঁপে উঠল।

মহেশ্বরের পায়ে বেড়ি-শিকল। এ অবস্থায় ভৈরবের সঙ্গে তার বোঝাপড়া করায় অসুবিধে হবার কথা। একে ভৈরব ক' দিন থেকে কেঁপে আছে, তাতে আবার ছাড়া পেয়েছে। বীণা আর কিছু ভাবতে পারল না—একমাত্র মহেশ্বরই এখন তার ভরসা। মহেশ্বরের কাছে গিয়ে সে তাড়াতাড়ি তার পায়ের বেড়ি খুলে দিল।

ছাড়া পাওয়া মাত্রই মহেশ্বর ঝড়ের বেগে একেবারে ভৈরবের উপর গিয়ে পড়ল। তার প্রকাণ্ড শুঁড় দিয়ে ভৈরবের একটা দাঁত জড়িয়ে ধ'রে এক হ্যাঁচকা টান মারল - তার পরেই দুই হাতীতে ভীষণ লড়াই আরম্ভ হল। কতক্ষণ তাদের লড়াই চলেছে বীণা তার কিছুই জানে না—সে অজ্ঞান হয়ে গিয়ে ছিল।

## পাঁচ

জ্ঞান হ'লে বীণা কষ্টে উঠে বসল। আগের কথা ভাবতে চেষ্টা করল—সমস্ত ঠিক পরপর মনে এল না। তার এক কথার মধ্যে আর এক কথা গুলিয়ে যাচ্ছিল। ভৈরবের কথা মনে হ'ল—তার পর মহেশ্বরের কথাও মনে পড়ল। জলবাড়ি থেমে গিয়েছে—সন্ধ্যা হয়ে এসেছে। এদিক-ওদিক তাকিয়ে তার চোখে পড়ল খোলা মাঠের মাঝখানে মহেশ্বর দাঁড়িয়ে, আর তার প্রকাণ্ড ছায়ার আড়ালে ভৈরব ম'রে প'ড়ে আছে। আশু আশু মনে পড়ল, ভৈরব তাকে তাড়া করেছিল। মহেশ্বর ভৈরবকে মেরে ফেলেছে। এতক্ষণে মহেশ্বরের হুকুম শোনা গেল—যেন তাল ঠুকে বলল, ভৈরবকে শেষ করেছি, এস, আর কে লড়বে!

বীণা উঠে বসেছে বুঝতে পেরে, মহেশ্বর তার দিকে এগিয়ে এল। তার শুঁড়ের আগাটা বীণার গায়-মাথায় একবার বুলিয়ে নিল। বীণা বার বার ভাবছিল কোন রকমে মহেশ্বরের পিঠে উঠতে পারলেই, বাংলাতে পৌঁছতে পারবে। এতক্ষণে তার বাবা-মা লোকজন নিয়ে খোঁজাখুঁজি আরম্ভ করেছেন।

বীণা সাহসে ভর ক'রে মহেশ্বরকে বসতে বলল—সে-কথায় সে আমলই দিলে না। মেজাজ তার তখনও বিগড়ে আছে।

কুলোর মত কান দুটো ঘনঘন নাড়ছে, আর মাঝে মাঝে শুঁড়টা মাথার উপর তুলে ঘোঁৎ-ঘোঁৎ শব্দ করছে।

বীণার আর কথা বলবার সাহস হ'ল না, সে চুপ ক'রে প'ড়ে রইল। অনেকক্ষণ এইভাবে কেটে যাওয়ার পর ক্রমে মহেশ্বরের স্বাভাবিক অবস্থা ফিরে এল। এবার তার মুখ দিয়ে যে গুরুগম্ভীর আওয়াজ বেরুল তার অর্থ “বাস্, সব ঠিক হয়ে গেছে!”

বীণা এই রকম শব্দ খুব চেনে—সে নির্ভয়ে “বৈঠ্”—ব'লে তাকে বসতে হুকুম করল।

মহেশ্বর কিন্তু তবুও বসল না। কাছেই সে মানুষের গন্ধ পাচ্ছিল—মানুষ জাতটাকে সে মোটেই পছন্দ করে না। একটুখানির জগ্গে স্বাধীন হয়েছিল, আবার একুনি বাঁধা পড়বে। ঐ ত দূরে আলো আর কথাবার্তার আওয়াজ টের পাওয়া যাচ্ছে—বোস্ সাহেব বীণার গাঁজে এদিকে আসছেন।

বীণা মহেশ্বরের মনের কথা বুঝতে পারল—মহেশ্বরের প্রকৃতি সে ভাল করেই জানে। মনে হ'ল মহেশ্বরকে ছেড়ে দিতে হবে—তা' হলে সে নিজের ইচ্ছেয় বনে বনে ঘুরে বেড়াতে পারবে। বোস্ সাহেবের লোকজন এসে পড়বার আগেই সে চলে যাক। বীণা হাত তুলে ‘চলে যা’ বলার ভঙ্গীতে বার, বার বলতে লাগল “ভাগো—জলদি ভাগো—”

মহেশ্বর হুকুম তামিল করার অভ্যাস মত চলে গেল—কি

ভেবে আবার ফিরে এল—যাই—কি—না-যাই—ঠিক করতে পারছে না। এক দিকে একটা ছোট মেয়ে তার মন টানছে, আর এক দিকে টানছে তার স্বাধীনতার বিচরণ ক্ষেত্র রহস্যময় বিরাট আসামের জঙ্গল।

মাতৃভূমির টান যেমন মানুষের পক্ষে সব চেয়ে বড় আকর্ষণ, মহেশ্বরের কাছেও তেমনি বনের টানই শেষ পর্যন্ত বড় হ'ল—কোথায় সে দেশ, তা সে কোন দিন দেখে নি, কেমন সে দেশ, তা-ও সে জানে না—তবুও সেই অজানা অরণ্য-দেশই তাকে ডাকছে। সে দৌড়ে বনের মধ্যে অদৃশ্য হয়ে গেল।—আর সে মানুষের চাকর নয়।

বীণার গলা শুন্তে পেয়ে, বোস সাহেব লোকজন নিয়ে এগিয়ে এলেন।

বাংলোয় ফিরে, সে রাত্রে বীণার আর গল্প করবার শক্তি ছিল না। তা' হ'লেও মহেশ্বরকে সে ছেড়ে দিয়েছে—সে তাকে একেবারে বনে চ'লে যাবার জগে ছেড়ে দিয়েছে, একথা খুলেই বলেছিল।

বোস সাহেব শুনে বললেন—ঠিকই হয়েছে। মহেশ্বর কোন দিনই তেমন ক'রে পোষ মান্ত না—বুনো-বুনো স্বভাব ওর মজ্জাগত। আর তা ছাড়া, সে তোমার প্রাণ বাঁচিয়েছে—সে কথা আমাদের ভুললে চলবে না।

নাথুরাম মংলাকে দিয়ে মহেশ্বরের দাঁত কেটে নেবার ক্ষে ষড়যন্ত্র করেছিল, এই ঘটনায় তা ভেসে গেল।

## ছয়

স্বাধীন জীবনের আশ্বাদ মহেশ্বরের কাছে একেবারে নতুন। সে পাগলের মত অন্ধকার বন ভেঙ্গে এগিয়ে চলল। সমস্ত রাত গেল, পর দিন রোদের তেজ না বাড়ি পর্যন্ত সে এগিয়েই চলেছিল। বেলা বাড়লে গরমে কষ্ট হতে লাগল। জঙ্গলের মাঝখানে একটা জলা থেকে প্রাণ ভরে সে জল খেল—ভয়ানক তেষ্টা পেয়েছিল। জল খেয়ে শরীরটা ঠাণ্ডা হ'ল না দেখে শুঁড় ভর্তি ক'রে জল নিয়ে সমস্ত গায়ে ছিটিয়ে দিল। সামনের পা দিয়ে মাড়িয়ে মাড়িয়ে একজায়গায় খানিকটা কাদা করল, তারপর সেই কাদা তুলে গায়ে ভাল ক'রে ছিটিয়ে দিল। তাতে শরীরটা বেশ ঠাণ্ডা হ'ল। জঙ্গলে মশা-মাছির হাত থেকেও রেহাই পেল। কারখানার কাছে মশা-মাছির এত উৎপাত ছিল না।

এবার সে দিবি আরামে চ'রে খেতে লাগল। তারপর কিছুক্ষণ বিশ্রাম ক'রে আবার চলা শুরু করল।

সন্ধ্যার দিকে তার চোখে পড়ল একদল হাতী, অর্থাৎ তারই স্বকাত চ'রে বেড়াচ্ছে। আগেও একদিন এই রকম হাতীর দলকে চ'রতে দেখেছিল, তখন তার পায়ে শিকল-পরানো ছিল। আজ যে স্বাধীন। দলের কতকগুলো পুরুষ হাতী মহেশ্বরকে

দেখে, মাথা নেড়ে আর কান ঝাড়া দিয়ে কয়েকটা হুক্কার দিল। মহেশ্বরের রক্ত টগ্‌বগ্‌ ক'র উঠল। ইচ্ছে হ'ল এখনই এই অর্ধবাটীন ক'টাকে একহাত দেখিয়ে দেয়। কিন্তু তখনও তার অজানা জঙ্গলরাজ্য তদারক করবার ঝাঁকই প্রবল।

চলেছে ত চলেছেই। নদী পার হ'ল, পাহাড়ে পাহাড়ে ঘুরে বেড়াল। কাঁটা বনের মাঝ দিয়ে গায়ের জোরে পথ ক'রে চলল। যেমন ইচ্ছে গেল, বিশ্রাম করল, খেয়াল হ'ল শুঁড় জড়িয়ে মোটা মোটা গাছের ডাল মটমট ক'রে ভাঙ্গল। এমনি করে পুরো একটা মাস গেলে, তার হঠাৎ-পাওয়া স্বাধীনতার উদ্দাম বেগ কিছু গন্দা হয়ে এল।

এ-পর্যন্ত সে বরাবর উত্তর মুখো চলছিল, এবার ফিরল। দিন কয়েক পরে, পথে আর একদল হাতীর সঙ্গে দেখা। এখন তার মন চাচ্ছে এই জাত-ভাইদের সঙ্গে মিশতে—তারও একটা দল থাকবে—সে দলের সেই হবে সর্দার। সেবারের মত, মহেশ্বর হাতীর দলকে এড়িয়ে না গিয়ে দলের মাঝ ঘেঁসে এগিয়ে এল—বেশ গদাই-লক্ষরি চালে। তার উঁচু লম্বা বিশাল চেহারা দেখে মেয়ে হাতীগুলো চেঁচাতে চেঁচাতে বাচ্ছাদের সঙ্গে নিয়ে এদিকে-ওদিকে ছুট দিল। হঠাৎ এই রকম একটা ব্যাপার ঘটতে ছোকরা হাতীগুলো খাওয়া ছেড়ে কান খাড়া ক'রে দাঁড়িয়ে গেল—দেখে, দলে কোথাকার একটা দাঁতাল ঢুকেছে। গতিক ভাল নয় বুঝলেও সহসা দাঙ্গা বাধাতে তাদের সাহস হ'ল না—যে প্রকাণ্ড দাঁত আর দশাসই চেহারা! ভাবল

অপেক্ষা করা যাক - দলপতি আশুক, তারপর যা হয় হবে। কাজেই তারা রাগে ফোঁস ফোঁস করতে থাকলেও মহেশ্বরকে আক্রমণ করল না।

দলের সর্দার-হাতী নিকটেই ছিল, একটু পরেই ছফ্কার দিয়ে বীরদর্পে এগিয়ে এল। সে-ও আর এক প্রকাণ্ড দাঁতাল— দেখলেই মনে হয় সর্দার হবার উপযুক্ত বটে! দেখতে দেখতে দুই হাতীতে তুমুল যুদ্ধ বেধে গেল।

দলপতিকে কাবু করা মহেশ্বরের পক্ষে নিতান্ত সহজ ব্যাপার নয়। ভৈরবকে সে দ্বন্দ্বযুদ্ধে মেরেছে বটে, কিন্তু সে মানুষের আওতায় বড় হয়েছিল। এই বন্য দলপতির তুলনায় তার গায়ের জোর, দাঁতের জোর অনেক কম ছিল। তা'ছাড়া এ দল নিয়ে বনে বনে চ'রে বেড়ায়, মাঝে মাঝে দুটো একটা দাঁতাল হাতীর সঙ্গে লড়াই করা তার অভ্যাসও আছে।

দুই হাতীর চীৎকার, আর গুঁতোগুঁতি। এক একবার মহেশ্বর দলপতিকে দাঁতের ধাক্কা মেরে ফেলে দিচ্ছে, আবার দলপতির ধাক্কা সামলাতে না পেরে মহেশ্বর ছিটকে পড়ছে। তাদের ধাক্কাধাক্কির চোটে আসে-পাশের গাছগুলো পাঁকাটির মত মটমট ক'রে ভেঙ্গে পড়ল—বাঁশ-ঝাড় উপড়ে গেল, পায়ের তলায় মাটি কুস্তির আখড়ার মাটির মত বুরবুরে ধুলো-ধুলো হয়ে গেল—যুদ্ধের তবু শেষ নেই। মাঝে মাঝে একটু সময়ের জন্যে দম নিয়ে আবার তুমুল কাণ্ড। এ যুদ্ধে আপোস-মীমাংসার স্থান নেই—একটাকে হারতে হবেই। তাকে হয় রাগে

ভঙ্গ দিয়ে সুযোগ মত পালাতে হবে, না হয় প্রাণ দিতে হবে।

যুদ্ধ শেষ হ'ল কিন্তু খুব হঠাৎ—অনেকক্ষণ লড়াইয়ের পর দলপতি আর টিকতে না পেরে পালিয়ে গেল। এমন দৌড় দিল যে, মহেশ্বরের দিকে ফিরে তাকাতেও আর তার সাহসে কুললো না--দেখতে দেখতে বনের মধ্যে অদৃশ্য হয়ে গেল। মহেশ্বরের দাঁতের গুঁতোয় তার সমস্ত শরীর বেয়ে দরদর ক'রে রক্ত পড়ছে। মহেশ্বরের উঠতি বয়স, আর সে বুড়ো হ'তে চলেছে। দলপতির জীবনে এতবড় প্রতিদ্বন্দ্বীর সঙ্গে তাকে কখনও লড়াই করতে হয় নি।

দলপতিকে সম্মুখ-সমরে হারিয়ে দিয়ে মহেশ্বর এখন থেকে এই হাতীর দলের দলপতি হ'ল। সে শুঁড় মাথার দিকে উঁচু ক'রে দলের মাঝে এসে দাঁড়ালো। পরপর বার করে ক হুকার দিল। তাল ঠুকে যেন জোর গলায় বলতে চায়—“এস, আর কে আমার সঙ্গে যুদ্ধ করতে চাও—এস!” বলা বাহুল্য দলের আর যে সমস্ত পুরুষ হাতী ছিল, তারা কেউ-ই এদিকে এগোলো না।



## সাত

মহেশ্বর তার দল সঙ্গে নিয়ে মাসের পর মাস বনে বনে চ'রে বেড়াতে লাগল। সে এখন স্বাধীন, - শুধু স্বাধীন নয়, সে একটা দলের সর্দার। এত দিন ধ'রে যা সে চেয়েছিল তা আজ পেয়েছে।

জঙ্গলের এক জায়গায় ছিল একটি পাহাড়ের নদী, আর অকুরন্ত বাঁশ-বন। দল নিয়ে সেখানে সে কিছুদিন আড্ডা গাড়ল। সকালে বিকালে নদীতে মহাফুর্তিতে স্নান করে, আর পেট ভ'রে বাঁশের কোঁড় খায়—বাঁশের কোঁড় জিনিসটা হাতীর খুবই প্রিয় খাদ্য। দুপুরের গরমে গাছের ছায়ায় যে-যার ইচ্ছে মত বিশ্রাম করে। এই ভাবে বর্ষাকাল কাটিয়ে আবার সে দল নিয়ে চলতে লাগল।

সে দল নিয়ে চলেছে,—বনে বনে মনের আনন্দে, স্বাধীন বে-পরোয়া ভাবে। মানুষের তা সহ্য হ'ল না। পাকা একজন হাতী-শিকারী লাগল এদের গতিবিধি লক্ষ্য করতে। তিনি ক্রমে খবর পেলেন, দলে আটটা পুরুষ হাতী, ষোলটা মেয়ে হাতী আর গোটা চারেক বাচ্ছা হাতী আছে।

অমনি সাজ সাজ রব প'ড়ে গেল। অনেক লোকজন লাগিয়ে ভাড়াভাড়ি এক জায়গায় 'খেদা' তৈরী হ'ল। তার-

পরের কাজ হাতীর দলকে তাড়া দিয়ে দিয়ে ক্রমে ক্রমে খেদার দিকে নিয়ে যাওয়া।

‘খেদিয়ে নিয়ে যাওয়া,’ অর্থাৎ ‘তাড়িয়ে নিয়ে যাওয়া’ থেকে, এই রকমে হাতী ধরার নাম, ‘খেদা’ ক’রে হাতী-ধরা হয়েছে।

মহেশ্বর চলতে চলতে হঠাৎ একদিন মানুষের হৈ হৈ শুনতে পেল। তারা অনেকে মিলে ঢাক, ঢোল, কাঁসি, জগবাম্প, কাড়া-নাগাড়া বাজিয়ে, মশাল জ্বলে তুমুল কাণ্ড আরম্ভ করে দিলে। উদ্দেশ্য হাতীর দলকে ভড়কে দিয়ে যেখানে তারা খেদা তৈরী ক’রে রেখেছে, সেইদিকে তাড়িয়ে নিয়ে যাবে। শিকারীটি খুব পাকা লোক, অনেক দিন থেকে, অতি সাবধানে এই দলের পিছন নিয়েছিলেন; কিন্তু তিনি জানতেন না যে, এ দলের যে দলপতি, তার মানুষের দেওয়া একটা নাম আছে—আর মানুষ-জীবটাকে সে বেশ জানে ও চেনে।

নিস্তরক বনে অকস্মাৎ এমন সোর-গোল হওয়ায় মহেশ্বরের সন্দেহ হ’ল। সে আর এগিয়ে না গিয়ে ঘুরে দাঁড়ালো—দলপতি সাধারণতঃ দলের পিছন দিকে থাকে। একটুখানি ভেবে নিল, ব্যাপারটা কি হ’তে পারে। মানুষের গন্ধ সে অনেক দিন পায় নি। বেশ ছিল। আবার এ উৎপাত কেন? সে ত মানুষের কাছে যায় না, তাদের কোন ক্ষতিও করে না। তবুও তারা তাকে নিশ্চিন্ত থাকতে দেবে না! বড় রাগ হ’ল তার। কুলী আর বন-তাড়ুয়ারা লাইন দিয়ে যে দিকে হৈ হৈ করছিল, সেই দিকে ভেড়ে গেল। অতবড় পাহাড়ের মত দাঁতাল এক ঐরাবতকে

রুখে আসতে দেখে লোকজন লাইন ভেঙ্গে যে যে-দিকে পারল  
প্রাণ নিয়ে পালিয়ে গেল। মহেশ্বর ছুঁকার দিতে দিতে অন্য দিক  
দিয়ে দল-বল নিয়ে বনের মধ্যে গা-ঢাকা দিল।

আবার তার বনে বনে চলা আরম্ভ হ'ল। এখন থেকে সে  
সাবধানে পথ চলে। এত বড় একটা দলের ভাল-মন্দ যার উপর  
নির্ভর করে তার অসাবধান হ'লে চলবে না—তার উপর মানুষ  
তার পিছু নিয়েছে। একসময় সে মানুষের কাছে শিকলে বাঁধা  
ছিল। ছাড়া পেয়ে জঙ্গলে জঙ্গলে ঘুরছে যেখানে মানুষের  
যাতায়াত নেই। ভেবে ছিল, আর কোন দিন সে মানুষের  
ত্রিসীমানায় যাবে না—কিন্তু মানুষ তাকে কিছুতেই ছাড়ছে না।

চলতে চলতে কখনও কখনও অসভ্য মিরি, মিস্‌মি, নাগাদের  
গ্রামের পাশ দিয়ে সে গিয়েছে। এদের উপর তার কোন রাগ  
হয় নি। কারখানার কাজ করবার সময় যে ধরনের মানুষ সে  
দেখেছে এরা মোটেই সে রকমের নয়—খামখা কেন সে এদের  
ক্ষতি করতে যাবে।

একবার সে নাগাদের একটা গ্রামের কাছে দল নিয়ে দিন-  
কয়েক আড্ডা করেছিল। গ্রামের লোকেরা প্রথমে খুব ভয়ে  
ভয়ে ছিল। তাদের ছোট ছোট কুঁড়েগুলো ইচ্ছে করলেই সে  
ভেঙ্গে চুরমার করে দিতে পারত। মহেশ্বরের দল তাদের কোন  
ক্ষতি করল না দেখে, একদিন তারা কত ভাল ভাল বুনোফল,  
কলাগাছ, কুলো ভ'রে ভ'রে ধান এনে খেতে দিল। এরা  
বেশ মানুষ

## আট

এরপর আট-দশ বছর কেটে গেছে। বোস্ সাহেবের কার্ঠের কারখানার কিছু পরিবর্তন হয়েছে। বোস্ সাহেব এখন কলকাতায় থাকেন। আসামের কারখানার কাজ-কর্ম দেখেন মল্লিক সাহেব—তঁার জামাই। বীণা বড় হয়েছে। সে এতদিন কলকাতায় পড়াশুনো করছিল। বিয়ের পরে মল্লিক সাহেবের সঙ্গে আবার তার ছেলেবেলাকার জায়গায় ফিরে এসেছে। আসামের জঙ্গল, কারখানার বাংলো তার কাছে একটুও নতুন নয়।

একদিন, লোকজনের মুখে খবর পাওয়া গেল বাংলো থেকে ষাট-সত্তর মাইল দূরে একটা প্রকাণ্ড বুনো দাঁতাল হাতী দেখা গেছে। সেটা দেখতে একটা ছোট-খাটো পাহাড়ের মত। এতবড় হাতী এ অঞ্চলে কেউ কখনও দেখে নি। মল্লিক সাহেবও কথাটা শুনেছিলেন—কিন্তু গুজোব কথায় তেমন কান দেন নি।

মাস দুই পরে একটা ভয়ানক কাণ্ড ঘটল। বাংলোয় রাত্রে খাওয়া দাওয়া হয়ে গেছে। শুতে যাবার আগে বাংলোর বারান্দায় বসে মল্লিক সাহেব চিঠি লিখছেন—পরদিন ডাকে পাঠাতে হবে। ডাকঘর এখান থেকে পাঁচ-ছয় মাইল দূরে।

সকালে একজন লোক কারখানার চিঠি পত্র নিয়ে ডাক-ঘরে যায় এবং বিকালের দিকে ডাকের চিঠিপত্র নিয়ে ফিরে আসে।

চিঠি লেখা প্রায় হ'য়ে এসেছে—রাত তখন বারটার কাছাকাছি। এমন সময় দূর থেকে লোকজনের হৈ-হৈ হল্লা শোনা গেল। গোলমাল ক্রমেই নিকটে আসতে লাগল। ব্যাপার কি জানবার জন্যে মল্লিক সাহেব বাংলোর বারান্দা থেকে সামনের উঠোন পার হয়ে এগিয়ে দেখতে গেলেন।

দেখতে দেখতে লোকজন কুলীমজুর একসঙ্গে হট্টগোল ক'রে কারখানার প্রকাণ্ড উঠোনে জমায়েত হ'ল। একটা বুনো হাতী তাদের বাড়ী-ঘর ভেঙ্গে তাড়া করেছে। আগুনকে হাতী সবচেয়ে বেশী ভয় করে। চারিদিকে কত মশাল জ্বালা হয়েছে। কিন্তু এ গুণ্ডা হাতী কিছুতেই লক্ষ্যে করছে না—ভেঙ্গে-চূরে তছ-নছ ক'রেই চলেছে।

মল্লিক সাহেব বন্দুক নিয়ে এলেন। কি হবে এ অবস্থায় বন্দুক দিয়ে? একটা দুটো গুলিতে কিছুই হবে না, বরং হাতীটা আরও ক্ষেপে যাবে। তা'ছাড়া হাতীর কোন্ জায়গায় গুলি করলে নিশ্চয়ই মরবে, মল্লিক সাহেব তা ভাল জানেন না।

হিংস্র জন্তুর মাথার ঠিক কোন্ জায়গায় লক্ষ্য ক'রে গুলি করলে সে গুলি তার মগজে গিয়ে বিঁধবে, পাকা শিকারীদের তা জানা দরকার। গুলি যেখানে-সেখানে লাগায় শিকার মরল না, এরকম হ'লে আহত জানোয়ার ক্ষেপে গিয়ে শিকারীকে

এমন ভীষণ আক্রমণ করে যে, তখন শিকারীর প্রাণ-বাঁচান কঠিন হয়।

মল্লিক সাহেব বন্দুক নিয়ে গুলি করবেন কি করবেন না ভাবছেন দেখে, বীণা এগিয়ে এসে বলল—এ হাতী নিশ্চয়ই আমাদের মহেশ্বর। আমাকে বাইরে যেতে দাও—ওকে আমি ঠাণ্ডা করে দিচ্ছি।

এরকম অদ্ভুত কথা কেউ কখনও শোনেনি—বীণা যাবে গুলি হাতীকে ঠাণ্ডা করতে! মল্লিক সাহেব উত্তেজনার মুখে বললেন—পাগল হয়েছ নাকি?

তারপর বীণাকে বললেন—তুমি খুকীকে নিয়ে আয়ার সঙ্গে আস্তাবলের ভিতর সাবধানে থাকোঁগে। খুকী, এদের তিন বছরের মেয়ে। আস্তাবলই সবচেয়ে নিরাপদ, কেননা হাতী কখনই ঘোড়ার কাছে এগুতে চায় না। এদের মধ্যে এই এক অদ্ভুত সম্পর্ক।

ততক্ষণে পাগলা হাতী বাংলোর বাইরে ফটকের কাছে এসে পড়েছে। কারখানার বাংলোর খুঁটি খুব মোটা মোটা শেগুনের। তারই একটা মোটা খুঁটি শুঁড় দিয়ে জড়িয়ে ধরে এক টান দিতেই বাংলোর সে-দিকটা মড়-মড় শব্দে ভেঙ্গে পড়ল। হাতী কয়েক পা হটে গেল—সে জানে যেখানে দাঁড়িয়ে টান মেরেছে সেইখানে দাঁড়িয়ে থাকলে বাংলা ভেঙ্গে তারই উপর পড়বে।

মল্লিক সাহেব এখনও কিন্তু গুলি করতে সাহস করছেন না। এক গুলিতে যদি শেষ না হয়, ফেপা হাতী যখন হলে কি আর রক্ষে থাকবে! তার চেয়ে দেখা যাক, ঘর-বাড়ী

ভাঙ্গবার ঝাঁক কেটে গেলে হয়ত আপনা থেকেই চ'লে যাবে।

বাংলোর যে-দিকটা ভেঙ্গে পড়ল, সে-দিকটায় ছিল আফিস কামরা। আফিসের চেয়ার টেবিল আলমারী কাগজপত্র সমস্ত লগু-ভগু হয়ে গেল—আর হাতীটা সেই সমস্ত পা দিয়ে মাড়িয়ে গুঁড়ো করল।

পনেরো-কুড়ি মিনিট ধ'রে তাণ্ডব নৃত্য ক'রে, তার খেয়াল হ'ল—চের হয়েছে, আর না। এবার সে স্বাভাবিক গজেন্দ্র-গমনে হেলে ছুলে বনের দিকে চ'লে গেল। যেতে যেতে দেখলে কয়েকটা পোষা হাতী বাঁধা রয়েছে—এদের কেউ কেউ তার আগের চেনা। মানুষের কৃতদাস এই সমস্ত জীবের দিকে স্বগায় সে ভাল ক'রে তাকালও না।

## নয়

বীণার অনুমান ঠিকই—এই হাতীটি আমাদের মহেশ্বরই বটে। এরকম ক'রে ক্লেপে যাবার কারণ তার ছিল।

দলবল নিয়ে বনে বনে বেশ চ'রে বেড়াচ্ছিল। এমন সময় শিকারীরা তাদের দলস্বদ্ধ খেদায় আটক করতে চেষ্টা করেছিল, কিন্তু কিছুই করতে পারেনি—সে খবরও একটু আগেই দিয়েছি। মহেশ্বর নিশ্চিন্ত ছিল এই ভেবে, যে মানুষে তার আর কিছু করতে পারবে না। তাদের ফন্দি-ফিকির তার ভাল ক'রেই জানা আছে।

সে বারে মহেশ্বর খেদায় আটক পড়ল না বটে; কিন্তু হাতী-শিকারীরা খুব ছ'সিয়ার লোক, এদের কাছ থেকে অত সহজে রেহাই পাওয়া গেল না। গোপনে গোপনে খুব সাবধানে লোক লেগে থাকল জঙ্গলের ভিতর কোন্ দিক দিয়ে হাতীর দলটা কোথায় যায় লক্ষ্য করার জন্যে।

এদিকে বর্ষা আরম্ভ হয়ে গেল। চারিদিকে হাজারে হাজারে চারাগাছ গজালো। গরমের সময় রোদের তেজে যে সমস্ত প্রকাণ্ড প্রকাণ্ড গাছের পাতা ঝ'রে নেড়া হয়ে গিয়েছিল সেগুলোতে আবার কচিকচি নতুন পাতা দেখা দিল। সমস্ত বনেরই চেহারা ফিরে গেল—মহেশ্বর সান্ধোপান্ন নিয়ে আনন্দে পেট ভ'রে খেয়ে বেড়াতে লাগল।



শিকারীর সন্ধানী লোক, যারা মহেশ্বরদের পিছু নিয়েছিল, তাদের কাছে, এ সময় খবর পাওয়া গেল, দাঁতাল সর্দারটাকে দলের ভিতর দেখা যাচ্ছে না। বুনো দাঁতাল হাতীদের একটা স্বভাব এই, তারা দল ছেড়ে কিছুদিনের জন্যে মাঝে মাঝে কোথায় যেন চলে যায়। শিকারীরা বলে, পাহাড় পর্বত পার হ'য়ে ওরা তখন উত্তর দিকে যায়। মাস দুই পরে দলে ফেরে, আবার আগের মত দলের খবরদারি করে। ঠিক কোথায় যায় কেউ বলতে পারে না—এটা যেন হাতীদের একটা গুপ্তকথা।

মহেশ্বর দল রেখে চলে গেল—আবার ফিরেও এল। কিন্তু এই মাস দুয়েকের মধ্যে একটা মস্ত দুর্ঘটনা ঘটে গেছে। তার দলের সমস্ত হাতীগুলোই মানুষে খেদা বন্দী ক'রে লুটে নিয়েছে। মহেশ্বর পুরোনো জায়গায় ফিরে, চারিদিকে ঘুরে দেখল, খেদার সাজ-সরঞ্জাম তখনও এদিকে-ওদিকে কিছু কিছু পড়ে রয়েছে। অন্য হাতী এ অবস্থায় দিন কয়েক মন-মরা হ'য়ে একা-একা ঘুরে বেড়ায়, তারপর সুবিধে বুঝে অন্য একটা দলে ভীড়ে যায়।

খেদা যেখানে হয়েছিল মহেশ্বর সেখানটা বার বার ঘুরে ঘুরে দেখল। দুটো বড়ী-হাতী আর একটা খোঁড়া দাঁতাল তখনও এক জায়গায় বাঁধা ছিল। আর এক দিকে একটা সরু পথ দেখতে পেল, অনেকগুলো হাতী এক সঙ্গে চ'লে গিয়েছে তাতেই পথ হ'য়ে প'ড়েছে। এই পথ ধ'রে সে এগিয়ে গেল,— আরও এগিয়ে গিয়ে নদীর ধারে এসে পড়ল। মাথাটা তার তখনও

ভয়ানক গরম—ভিতরে ভিতরে জ্বলে যাচ্ছে—সে নদীতে নেমে আচ্ছা ক'রে স্নান করল।

যে পথ ধ'রে সে এল, সে পথ নদীর ধার দিয়ে গিয়েছে। আরও এগিয়ে গেলে দেখল, তারই দলের হাতীগুলো শিকল দিয়ে একটা একটা ক'রে মোটা মোটা গাছের সঙ্গে বাঁধা রয়েছে। অন্যদিকে ডাকাত মানুষ গুলো তাঁবুর ভিতরে খুব আমোদ-আহ্লাদে মেতে আছে।

মানুষের উপরের রাগ মনের আনন্দে বনে বনে ঘুরে বেড়ানোয় চাপা প'ড়ে গিয়েছিল, সেই পুরোনো রাগ আবার মাথা-চাড়া দিলে। কুলী মজুরগুলো ত নগণ্য। খাকী-প্যান্ট-পরা ছাট্-মাথায় লোকগুলোই হচ্ছে নর্কের গোড়া। মহেশ্বর এদিক-ওদিক তাকাল, তারপর রাগে গর্-গর্ করতে করতে প্রকাণ্ড দেহ নিয়ে নিকটে জঙ্গলের আড়ালে দাঁড়িয়ে দেখতে লাগল।

একটু পরে একজন প্যান্ট-পরা ছাট্-মাথায় ডাকাত-লোক ঘোড়া ছুটিয়ে তাঁবুর কাছে এসে চটপট কি-সমস্ত হুকুম দিয়ে, হাতীগুলোকে খেতে দেওয়ার ব্যবস্থা ক'রে, যেমন ঘোড়া ছুটিয়ে এসেছিল তেমনি তাড়াতাড়ি ঘোড়া ছুটিয়ে চলে গেল। মহেশ্বর ঘোড়ায়-চড়া লোকটাকে কেন যে কিছু বলল না তা সেই জানে।

মনে পড়ল তার সেই অনেক দিনের বন্দী দিনের কথা। বোস্ সাহেবের বাংলোর কথা। সেখানেও একজন প্যান্ট-পরা ছাট্-মাথায় মানুষ থাকে, সেই ত তাকে পায়ে শিকল দিয়ে বেঁধে রেখে ছিল। মাথায় আগুন জ্বলে উঠল দপ্ ক'রে—তখনই সে

বোস্ সাহেবের কারখানা এবং তাঁর বাংলোর দিকে ছুটল—সে জায়গাটা আসামের জঙ্গলের কোন্ দিকে মহেশ্বর এত দিনেও তা ভোলে নি। তবে সে জানে না যে, সেখানে তার সেই পুরোনো মালিক বোস্ সাহেব আর থাকেন না।

মহেশ্বর সেখানে গিয়ে যে সব কাণ্ড ক'রেছে তা আগেই ব'লেছি।

## দশ

ঝড়ের পর চারিদিক্ শান্ত হয়। রাগের ঝাঁকে সুন্দর সাজানো-গোছানো বাংলোর খানিকটা ভেঙ্গে চূরে তছ-নছ ক'রে মহেশ্বরের রাগ প'ড়ে এল—অন্ধকার জঙ্গলে গিয়ে সে হাঁপাতে লাগল।

কি বিপুল তার দেহ! সাতাশ বছর বয়সেই সে সাধারণ বুনো হাতীর চেয়ে অনেক বেড়ে উঠেছিল—তারপর থেকে প্রতি বৎসরেই বেড়েছে। মানুষের হাত থেকে ছাড়া পেয়ে সে যে কেবল খেয়ে দেয়ে ওজনে বেড়েছে তা নয়—শক্তিও তার অসম্ভব রকম বেড়েছে। বত্রিশ বছর বয়সে সে দেখতে একটা ছোটখাট পাহাড়, শক্তিতে দশটা হাতীর সমান। পুরো সাত হাত উঁচু—মাটি থেকে গর্দান পর্য্যন্ত। ওজনে দেড়শ মণ, সামনের পায়ের বেড় তিন হাতেরও বেশী। প্রকাণ্ড দুই দাঁতের কথা বলতে গেলে বলতে হয় এ রকম একজোড়া সুন্দর আর মস্ত দাঁত আসামের জঙ্গলে কেন, সারা ভারতবর্ষ এবং ব্রহ্মের জঙ্গলেও দেখতে পাওয়া যায় না।

এরপর এল তার মন-মরা ভাব। একটা বছর গেল সেই মন-মরা ভাব কাটতে। পরের বছর সে খানিকটা সুস্থ হ'ল। এই বছর সে নিজের মনে জঙ্গলে জঙ্গলে ঘুরে ফিরে খেয়ে

বেড়াল। সেই বছরের শেষের দিকে আমাদের চেনা সেই নাথুরাম আর এক কাণ্ড ক'রে ছিল।

মহেশ্বর এক সময়ে বোস্ সাহেবদের কারখানার হাতী ছিল। সে জঙ্গলে পালিয়ে গিয়েছে। পুলিশকে এ খবর জানান হয়েছে। মহেশ্বরকে যে কেউ আবার ধরুক না কেন—সে আইন অনুসারে বোস্ সাহেবদের সম্পত্তি। তবে, কেউ তাকে ধ'রে কাঠের কোম্পানীর হাতে ফিরিয়ে দিলে কোম্পানী তাকে বখশিস করতে পারে। নাথুরাম, মহেশ্বরের খবর পেয়ে, ঠিক করল সে তাকে গোপনে ধ'রে একেবারে মণিপুরের সীমানায় নিয়ে বিক্রী ক'রে দেবে—যেমন ক'রে চোরেরা তাদের চোরাই মাল বিক্রী করে। এই হাতীই যে এক সময় কাঠের কোম্পানীর হাতী ছিল, আর তার নাম ছিল মহেশ্বর,—সে কথা প্রকাশ পাবে না। কিন্তু হাতীর গায়ে কোম্পানীর নামের মার্কা দেওয়া আছে। এত দিনে সে মার্কা খানিকটা অস্পষ্ট হয়ে গেছে নিশ্চয়ই। তারই উপর নাথুরাম নিজের নামের মার্কা মোটা মোটা কায়েথী অক্ষর দিয়ে, আগেকার মার্কা ঢেকে দেবে।

অনেক দিন আগে নাথুরামের কাছে মংলার একবার ডাক প'ড়েছিল, মহেশ্বরের দাঁত কেটে নেবার যুক্তি আঁটতে। আজ আবার তার তলব হ'ল মহেশ্বরকে ধরে গোপনে গোপনে বিক্রীর ব্যবস্থা করতে। মংলা ছিল মহেশ্বরের মাহুত—সে ছাড়া আর কেউ তাকে সহজে কায়দা ক'রতে পারবে না।

বুনো হাতী ধরার অনেক রকম কায়দা আছে। খেদা তৈরী করে, হাতীর দল তার মধ্যে তাড়িয়ে আটক করাই হ'ল সাধারণ ব্যবস্থা। তা' ছাড়া গর্ত কেটেও হাতী ধরা হয়। তা'তে একটা হাতী ধরা পড়ে। শিকারীর লোকেরা জঙ্গলে গভীর একটা গর্ত কেটে তার উপরটা ডালপালা দিয়ে ঢেকে দেয়। তার পর হাতীকে তাড়িয়ে এনে সেই গর্তে ফেলে।

সন্ধানী লোকেরা নাথুরামকে এসে খবর দিল, পাহাড়ের ধারে পাহাড়ীদের গ্রামের কাছে মহেশ্বরকে দেখা গিয়েছে। তার মেজাজ, যতদূর লক্ষ্য করা গিয়েছে, বেশ ভালই। খবর পেয়ে নাথুরাম লোকজন নিয়ে রওনা হ'ল—মংলাও অবশ্য সঙ্গে চলল। পাহাড়ীদের গ্রামে পৌঁছে, ভাল রকম বক্শিস করে নাথুরাম গ্রামের সর্দারকে আগে হাত করল। তারই সাহায্যে মহেশ্বরের চলা-ফেরার পথে দশ হাত গভীর একটা গর্ত কাটালো। সর্দারের সঙ্গে কথা থাকল তাদের এই হাতী ধরার কথা একেবারে গোপন রাখতে হবে। আসামের জঙ্গল এত প্রকাণ্ড যে, কোথায় তার কি হচ্ছে তা' আপনা-আপনি প্রকাশ হবার সম্ভাবনা কম।

জায়গা বেছে গর্ত কাটা হ'ল। গর্তের মুখে এক দফা বাঁশ ফেলে, তার উপরে গাছপালা দেওয়া হ'ল। বুঝবার জো থাকল না যে, নীচের গর্ত আছে। সমস্ত ব্যবস্থা ঠিকঠাক হ'লে, চারজন জংলী মহেশ্বরের দিকে এগিয়ে

গেল। উদ্দেশ্য, মহেশ্বরকে রাগিয়ে দেওয়া। এ জন্যে বেশী চেষ্টা করতে হ'ল না। বিশেষতঃ, মহেশ্বর যখন বুঝতে পারল, এরা তার সঙ্গে খোঁচাখুঁচি করতে এসেছে, তখন সে অল্পতেই রুখে এল। এরা একে বেকে, এ-গাছে ঘুরে ও-গাছে ঘুরে পালাতে লাগল। মহেশ্বর তাদের ধ'রতে না পেরে আরও ক্লেপে গেল,—সে-ও গাছপালা ভেঙ্গে তাড়া করল। জংলী ক'জনই আগে থেকে ঠিক ক'রে রেখেছে, তেমন তেমন বেগতিক দেখলে, কোন্ কোন্ গাছে উঠে প্রাণ বাঁচাতে পারবে।

মহেশ্বরের অদৃষ্টি দুঃখ ছিল, তাই সে রাগের চোটে বিবেচনা-শূন্য হয়ে তাড়া করছিল। তা' না হ'লে হাতী সাধারণতঃ পথ চলবার সময় ভাল ক'রে পথের অবস্থা দেখে-শুনে খুব হুঁসিয়ার হ'য়ে চলে। জানা পথে নিঃসন্দেহে যায়। অজানা পথে, পদে পদে পথের অবস্থা পরীক্ষা ক'রে তবে এগোয়।

যে রকম মতলব আঁটা হয়েছিল, তাই-ই হ'ল। মহেশ্বর লোক কয়জনকে তাড়া করতে করতে শেষকালে সেই গর্তের মধ্যে ছড়'মুড়' ক'রে প'ড়ে গেল। আর যায় কোথায়! নাথুরামের লোকজনেরা জড়ো হয়ে যে যেমন পারল তার উপর অত্যাচার আরম্ভ করল। কেউ তাকে পাথর ছুড়ে মারল, কেউ ছুঁচলো বাঁশ দিয়ে খোঁচাল, কেউ তার গায়ে জ্বলন্ত মশাল দিয়ে ছেঁকা দিল। মহেশ্বরের সমস্ত শরীর

কেটে রক্ত বেরিয়ে গেল—তবুও তাদের অত্যাচার চলতে লাগল। মহেশ্বরের অপরাধ সে যন্ত্রণায় এবং রাগে তখনও চীৎকার করছিল। গর্ত গভীর, কিন্তু লম্বা-চওড়ায় কম, তার মধ্যে মহেশ্বরের নড়াচড়া করবার জো ছিল না। সে শুঁড় দিয়ে গর্ত বড় করবার চেষ্টা করল—কিন্তু সব বৃথা হল।

এই অবস্থায় তিন দিন গর্তের মধ্যে থাকবার পর দেখা গেল, মহেশ্বরের হাড়-পাঁজরা বেরিয়ে পড়েছে—প্রকাণ্ড শরীরটা শুধু কঙ্কালের উপর চামড়া দিয়ে ঢাকা—সে খুঁচে।

নাথুরাম বুঝল, এখন তাকে সহজেই কায়দার মধ্যে আনা যাবে। সে গর্তের মাঝে কিছু খাবার জিনিস আর জল নামিয়ে দিল। মহেশ্বরের ছেলেবেলায় একবার ঠিক এই রকম হয়েছিল। তখন যে রাগে দুঃখে প্রথম প্রথম কিছুই খায়নি। এবার সে অনেক সেয়ানা। জানছে, খেয়ে দেয়ে আগে জোর না করলে এর প্রতিশোধ নেওয়া যাবে না। সে বেশ নির্বিবাদে জল খেয়ে, তারপর খাবার খেয়ে নিল। নাথুরাম ভাবল লক্ষণ ভাল। মহেশ্বরও মানুষ জাতটাকে হাড়ে হাড়ে চেনে,—সময় আসুক তখন সূদে আসলে এর শোধ সে তুলবে।

মহেশ্বর খেতে আরম্ভ করেছে, আর বেশ শান্ত শিষ্ট হয়ে আছে দেখে, লোকজনেরা গর্তের এক দিকের মাটি



ঢালু ক'রে কেটে তাকে উপরে তুলল। আবার সে মানুষের শিকল পায়ে পরল। মংলা তাকে বসতে বললে বসল, উঠতে বললে উঠল—কম্বে স্ফেটে তাকে কাঁধে চাপিয়ে হাত কয়েক ঘুরে ফিরে এল।

ধরা পড়ার পর এক দিন, দুই দিন ক'রে দশ মাস হয়ে গেল, মহেশ্বর একটু একটু ক'রে গায়ে জোর পাচ্ছে। মংলা তাকে অকারণে যখন তখন ডাক্তার মেরে বাহাদুরি দেখায়, মহেশ্বর সহ করে—যেন কতই সে নিরীহ গোবেচারী বাধ্য হাতী। আরও কিছু দিন তাকে এ সমস্ত সহ করতে হবে—তারপর সে দেখে নেবে। প্রথমেই শেষ করবে ঐ মাহুত মংলাকে—তারপর সমস্ত মানুষ-জন্তু-গুলোকে শুঁড় দিয়ে টেনে এনে পায়ের তলায় পিষে মারবে।

### এগার

লোকে যখন মনে করে সব ঠিক চলছে, দুর্ভাবনার কোন কারণ নেই, অনেক সময় ঠিক সেই সময়েই সকলের চোখ এড়িয়ে আস্তে আস্তে বিপদের কালো মেঘ জমা হতে থাকে। বোস্ সাহেবের চাকরিতে থাকবার সময় মংলাই মহেশ্বরের মাহুত ছিল। তখন সে তাকে চালাত, এখন আবার সেই তার মাহুত হয়েছে। নাথুরামের কাছে মাইনে বেশী পাচ্ছে, তাতেই সে খোশমেজাজে আছে। আগের মহেশ্বর আর এখনকার মহেশ্বরে যে কতখানি তফাৎ তা সে বুঝতে চেষ্টা করে নি। প্রকৃতির অস্বাভাবিক নিস্তব্ধতা বাড়ার পূর্ব লক্ষণ—মহেশ্বরেরও অত্যন্ত বাধ্য হয়ে চলা তার খুনে-মূর্ত্তি ধরার পূর্ববাভাস।

মহেশ্বর স্তম্ভ হয়ে উঠছে, এবং মংলার খুব বাধ্য হয়ে চলছে। এই সময় নাথুরাম একটা খেদা করল। লোক-জনেরা দুই মাস ধরে আস্তে আস্তে একদল হাতীকে খেদার দিকে তাড়িয়ে আনল। দুই ধারে পাহাড়, তার মাঝখান দিয়ে ছোট নদী, জল শুকিয়ে বালি-সার হয়ে আছে। সরু পথে হাতীর দল তাড়া খেয়ে এগিয়ে যাচ্ছিল। খানিক দূরে গিয়ে নদীর খাদ বেঁকে গিয়েছে। বাঁকের

মাথায় আর এগিয়ে যাবার পথ বন্ধ ক'রে দলটাকে একটা সমান জায়গায় তাড়িয়ে নিয়ে গেল, সেই খানেই তিন দিক ঘিরে হাতী আটকানর খেদা তৈরী ছিল। ঘেরা জায়গায় হাতীর দল চুকলেই হুঁদুর-কলের দরজার মত, বুলনো দরজা পড়ে গেল—হাতীর দল তার মাঝে আটকা পড়ল। খেদার বেড়া এবং তার দরজার ভিতর দিকে মস্ত মস্ত পেরেক পোঁতা। খেদা ভেঙ্গে বেরুতে চেষ্টা করলে সেই পেরেকের খোঁচা লাগে। জ্বলন্ত মশালের ছেঁকা, ছুঁচলো বাঁশের খোঁচা— এ সমস্তও আছে।

দিন কয়েক এই বন্দী হাতীদের না খেতে দিয়ে দুর্বল ক'রে, শেষে পোষা হাতী দিয়ে এক একটা ক'রে তাদের পায়ে শিকল পরানো হয়। হাতী ধরা এবং ক্রমে তাদের সায়েস্তা ক'রে, অর্থাৎ শিক্ষা দিয়ে মানুষের কাজে লাগানোর এই হ'ল পদ্ধতি। অবশ্য ব্যাপারটা যত সংক্ষেপে বলা হ'ল কাজের বেলায় তত সংক্ষেপে হয় না। এ কাজে টাকা খরচ করতে হয় যথেষ্ট, লোকজনও দরকার হয় অনেক, এবং তাদের জীবনের আশঙ্কাও থাকে পদে পদে।

নাথুরাম যে হাতীর দলটিকে খেদায় ধরলে, তাদের সায়েস্তা করবার জন্যে কয়েকটা পোষা হাতী এল—তার মধ্যে মহেশ্বরও ছিল। নাথুরাম ভেবেছিল, মহেশ্বরের বিশাল চেহারা এবং তার মস্ত দাঁত দুটো দেখেই বুনো হাতীরা ভয় পেয়ে যাবে। তখন তাদের বাগে আনা সহজ হবে। সাধারণতঃ হয়ও

তাই। একটা দুটো বড় দাঁতাল হাতী সামনে থাকলে, খেদায়-পড়া নতুন হাতী বশ করা সোজা হয়। কিন্তু মহেশ্বরকে এই কাজের মধ্যে টেনে এনে নাথুরাম ফ্যাসাদ বাধালে।

মহেশ্বর ছিল খেদা থেকে মাইল-খানেক তফাতে। হাতীর দলের করুণ চীৎকার তার কানে আসছিল—তাতে তার মনটা মাঝে মাঝে কেমন বিগড়ে যাচ্ছিল। এমন সময় মংলা এসে তার পায়ের শিকল খুলে দিয়ে, কাঁধের উপর বেয়ে উঠল। আরও বারোটা পোষা হাতী, তার সঙ্গে শিকল, দড়িদড়া, প্রভৃতি নিয়ে চলল। মহেশ্বর বুঝতে পারল হতভাগ্য বন্দীগুলোকে বশ করা হবে, এ হচ্ছে তারই আয়োজন। মানুষের চাল-চলন তার ত আর অজানা নয়!

খেদার দরজা খোলা হ'লে, পোষা হাতীগুলো একে একে খেদার মধ্যে ঢুকে প'ড়ল। মহেশ্বর ছিল সামনে—অন্য হাতী-গুলো তার পিছনে পিছনে লাইন ক'রে। এইবার একটা একটা ক'রে বড় হাতীগুলোকে আগে বেঁধে ফেলা হবে। মংলা, মহেশ্বরের শুঁড়ের কাছে মোটা এক গাছা কাছি এগিয়ে দিয়ে, একটা দাঁতাল হাতীকে বাঁধতে ছকুম করল। মহেশ্বর গোঁ-ধ'রে দাঁড়িয়ে রইল—ছকুম তামিল করবার ইচ্ছে তার মোটেই নেই। সে এক জায়গায় দাঁড়িয়ে দাঁড়িয়ে শুঁড় দিয়ে ফৌস ফৌস করতে লাগল। আর তার কুলোর চেয়েও বড় কান দুটো বার কয়েক ফটাফট্ করল।

কথা শুনল না দেখে মংলার রাগ হয়ে গেল। এক-ঘা ডাঙ্গশ মেরে, হুকুম তামিল করতে বলল। আর যায় কোথা! ডাঙ্গশ মারবার সঙ্গে সঙ্গে, মহেশ্বর এমন গা-ঝাড়া দিল যে, মংলার মত পাকা মাহুত তার কাঁধের উপর থেকে ছিটকে পড়ে গেল। আর একটু হলেই মহেশ্বরের পায়ের তলায় তার ভবলীলা সান্ন হচ্ছিল, নেহাৎ পরমায়ু ছিল—তাই সে কোনও গতিকে খেদার বাইরে পালিয়ে এসে বেঁচে গেল।

বে-গতিক দেখে, লোকজনেরা খেদার দরজা ফেলে দিল। দরজাটা হুঁদুর-ধরার বাস্ক-কলের দরজার মত একটা শক্ত দড়িতে ঝোলে। দড়ি কেটে দিলে, ভারী দরজা ধপাং করে পড়ে খেদার মুখ বন্ধ হয়ে যায়।

এ দিকে দরজা বন্ধ হয়ে গেল, হাতের শিকার মংলাও একটুর জন্মে ফস্কে গেল, মহেশ্বর আরও ক্ষেপে উঠল। তার মাথার ভিতরে তখন আগুন জ্বলছে, দু-চারটে খুন-জখম, অন্ততঃ কিছু একটা ভেঙ্গে চূরে চূরমার না করতে পারলে সে আগুন নিব্বে না।

দরজাটা চোখের সামনে বন্ধ হয়ে গেল, আর সে খেদার মধ্যে আটক পড়ে গেল, কাজেই মহেশ্বরের প্রথমেই রাগ হ'ল ঐ দরজাটার উপর। অমনি দরজা ভাঙতে এগিয়ে গেল। কিন্তু দরজার গায়ের মোটা মোটা ছুঁচলো পেরেকের খোঁচা খেয়ে পিছিয়ে এল। ওদিকে সুবিধে হ'ল না। খেদার ভিতর দিকে ঐ রকম ছুঁচলো মুখ-বের-করা পেরেক

সর্বত্র । মাথা ঠিক করে এদিক-ওদিক ভাল করে চেয়ে দেখল । একটা খুব মোটা খুঁটিতে পেরেক ছিল না । খুঁটিটা খুবই শক্ত, হাতীতে তার কিছু করতে পারবে না ভেবে, আর পেরেক লাগানো হয় নি । মহেশ্বর সেই খুঁটিটাতেই কাঁধ লাগিয়ে চাপ দিল । প্রথম চাপেই খেদা কেঁপে উঠল, দ্বিতীয় চাপে খুঁটি কাত হ'য়ে পড়ল । তারপর আর এক চাপ দিতেই খুঁটি মড়মড় ক'রে ভেঙ্গে গেল ।

মহেশ্বরকে আর পায় কে । সে কেবল নিজের স্বাধীনতা পেলেই খুশী নয়—পোষা হাতীগুলোকে গুঁতিয়ে খেদা থেকে বের ক'রে দিতে লাগল । একটা দাঁতাল,—বোধ হয় সে নাথুরামের নিমক কিছু বেশী ক'রে খেয়েছিল,—সেই জন্মে তখনও প্রভুভক্তি দেখিয়ে বাহবা নেবার ইচ্ছেয়—মহেশ্বরকে ভেড়ে এল । মহেশ্বর তার পাঁজরে দাঁত দিয়ে মারল এক ঘা, তাতেই সে ডিগবাজি খেয়ে পড়ে গেল । আর কোন হাতী তার দিকে এগলো না ।

বুনো হাতীর দল এতক্ষণে ছুটোছুটি ক'রে বাইরে এসে শুকনো নদীর খাড়ি পথ ধ'রে যে যে-দিকে পারল দৌড় দিল । লোকজনও প্রাণের ভয়ে কেউ গাছে উঠে, কেউ-বা পালিয়ে বাঁচল । সমস্তই লগুভগু হয়ে গেল,—তবে এ যাত্রায় কারও প্রাণহানা হয়নি—এই টুকুই যা সাস্থনা ।

খেদার সমস্ত হাতীগুলোই বেরিয়ে গেল, কয়েকটা

পোষা হাতীও বনে পালিয়ে গেল। মহেশ্বর ত হাতছাড়া হ'লই,— নাথুরামের কত হাজার টাকা যে নষ্ট হ'ল তা বলা যায় না। বেচারা ভেবেছিল, হাতী-খেদা ক'রে রাতারাতি বেশ কিছু লাভ করবে, তা খুবই হ'ল—একেই বলে অতি লোভে তাঁতি ডোবে। আর মহেশ্বরও কিছু শোধ তুলল বৈকি।

## বার

ঘাড়ে একবার ভূত চাপলে, সহজে সে আর নামতে চায় না। মহেশ্বরের ঘাড়েও ভূত চাপল 'সে মানুষের তৈরী সবকিছু ভেঙ্গে চূরে একাকার ক'রে দেবে। তাদের তৈরী কিছু আর সে রাখবে না—সে গুণ্ডা হয়ে গেল।

পশ্চিম মুখো চলতে চলতে, পাহাড় জঙ্গল পার হয়ে ধনসুই নদীর কাছে এল। লোকজনের বসতি নেই—জঙ্গলের মাঝে মাঝে কোথাও কোথাও কুকি, নাগা, মিসমি, এই সমস্ত পাহাড়ীদের ঘরবাড়ী। এ সমস্ত ভাঙ্গবার প্রবৃত্তি মহেশ্বরের নেই। মহেশ্বরের রোখ চেপেছে, সে মানুষদের এক হাত দেখে নেবে—আর, মানুষ বলতে মহেশ্বর বোঝে সভ্য মানুষ, যারা ফিট্‌ফাট্ থাকে, রঙ্গীন জামাকাপড় পরে, নানা রকম ফন্দি-ফিকির ক'রে তাদের জঙ্গল-দেশটা লুটে খাচ্ছে। অসভ্য পাহাড়ীরা ত' মহেশ্বরের শত্রু নয়—এদের উপর তার কোন রাগ নেই।

ধনসুই পার হয়ে, আরও পশ্চিমে গেল—এ দেশে সে আগে কখনও আসে নি। আরও,—আরও এগিয়ে দেখল পরিষ্কার একটা পথ চলে গেছে—টিলার মত কয়টা পাহাড়ের গা-ঘেঁষে। এটা আসাম-বেঙ্গল রেল-পথ। মহেশ্বর জীবনে



আর রেল-পথ দেখে নি, কিন্তু তার মন বলে দিল—এ জিনিস নিশ্চয়ই মানুষের তৈরী।

ভাবছে এটা কি হতে পারে, আর ভাবছে এটাকে গুঁতিয়ে উল্টেপাল্টে ফেলবে কিংবা পা দিয়ে চেপ্টে দেবে কি না, এমন সময় লাইনের উপর দিয়ে একখানা রেলগাড়ী আসতে দেখা গেল। প্রকাণ্ড একটা কালো দৈত্য হুস্‌হুস্‌ করতে করতে ছুটে চলেছে। পঞ্চাশটা হাতী যেন সার বেঁধে হৈ হৈ ক'রে দৌড়ছে—আর তাদের পায়ের দাপাদাপিতে বনজঙ্গল, এমন কি নীচের মাটি পর্যন্ত কাঁপছে। এঞ্জিনের বিদ্যুটে শব্দ এবং জানোয়ারগুলোর,—অর্থাৎ ট্রেন খানার—দৌড়বার ধরণ তাকে অবাক করে দিয়েছিল। সে লাইন থেকে তফাতে সরে গেল।

ট্রেনটা অনেক দূরে চলে গেল, তখনও তার শব্দ শোনা যাচ্ছে। শব্দ ক্রমে কম হ'তে হ'তে, চারিদিক যেমন চুপচাপ ছিল, আবার সেই রকম চুপচাপ হয়ে গেল। আগাগোড়া সমস্ত ব্যাপারটা মহেশ্বরের কেমন অদ্ভুত মনে হ'ল। অনেকক্ষণ পরে সাহস করে সে লাইনের দিকে আস্তে আস্তে এগিয়ে গেল—সম্পূর্ণ সাহস তার তখনও ফিরে আসে নি।

ঘণ্টা তিনেক পরে আবার একখানা ট্রেন সেখান দিয়ে চ'লে গেল। মহেশ্বর এবার শুঁড় উঁচু ক'রে, ট্রেনখানার গন্ধ শুঁকতে চেষ্টা করল—কিছুই বুঝতে পারল না। এর পর তৃতীয় ট্রেনখানা চলে যাবার সময় সে লাইনের দিকে অনেকখানি এগিয়ে গেল—জন্তুটা তাকে তাড়া ক'রে আসে কিনা পরখ করবার জন্যে।

আশ্চর্য্য, জানোয়ারটা তাকে তেড়ে ত' এলই না—তার দিকে ফিরেও তাকালো না—ঘষ্-ঘষ্ ক'রতে ক'রতে সোজা চলে গেল। মহেশ্বর এবার লাইনের অনেক কাছে এসেছিল, ট্রেনের ভিতরের যাত্রীদেরও দেখতে পেল। সে আরও অবাক হয়ে গেল—এ জানোয়ারও তা হ'লে মানুষের চাকর !

রাতের দিকে ট্রেন চলাচল ছিল না। অনেকক্ষণ দাঁড়িয়ে দাঁড়িয়ে শেষে মহেশ্বর লাইনের পাশ ধ'রে চলতে আরম্ভ করল। অদ্ভুত জানোয়ারটা অতগুলো মানুষ নিয়ে কোথায় গেল দেখতে হবে। যেখানে দাঁড়িয়ে মহেশ্বর ট্রেন দেখেছিল, সেখান থেকে লামডিং স্টেশন তিন মাইলের বেশী নয়। কাজেই অল্পক্ষণ পরে সে স্টেশনের কাছে এসে পৌঁছল। স্টেশন থেকে কিছু দূরে একটা লাইনের উপর খান-কয়েক খালি গাড়ী দাঁড়িয়েছিল। মহেশ্বর বেশ ক'রে দেখল জানোয়ার কয়টা এক জায়গাতেই চুপচাপ দাঁড়িয়ে আছে। কোনও জন্তুই ত এত স্থির হ'য়ে দাঁড়িয়ে থাকে না। অদ্ভুতঃ মহেশ্বর কখনও এ রকম জন্তু দেখে নি। সে এক পা এক পা ক'রে সাবধানে কাছে গেল—জানোয়ারগুলো তেড়ে এল না—এক পা নড়লও না। শুঁড়ের আগা দিয়ে গাড়ী কয়খানা ছুঁয়ে দেখল—একেবারে পাথরের মত ঠাণ্ডা। এত ঠাণ্ডা কোনও জানোয়ার হতে পারে না! এটা তা' হ'লে নিশ্চয়ই কোন জন্তু-জানোয়ার নয়—মানুষের তৈরী কিছু একটা জিনিস।

যেই মনে হ'ল, মানুষের তৈরী একটা-কিছু অমনি তার রাগ চেপে গেল। নিকটের গাড়ীখানাকে এক ধাক্কা দিল,—সে ওটাকে উল্টে দিতে চায়। কিন্তু কি আশ্চর্য্য, ধাক্কা মারলে ঘরবাড়ী যেমন মড়মড়্ ক'রে ভেঙ্গে পড়ে এ জিনিস সে রকম ভেঙ্গে পড়ল না, গড়গড়িয়ে লাইন দিয়ে দৌড় দিল। আর কিছুক্ষণ এই রকম দৌড় দিলে, মহেশ্বর বোকা ব'নে যাচ্ছিল। কিন্তু ধাক্কার বেগ কমে গেলে, গাড়ী থেমে গেল দেখে সে বেশ বুঝতে পারল, কাঠের কারখানায় কাজ করবার সময় তারই ধাক্কায় মোটা মোটা গাছের গোড়া পাহাড়ের উপর থেকে গড়িয়ে নীচে পড়ে যেত, এ-ও সেই রকম হ'ল। রেলগাড়ীর গতিবিধি সম্বন্ধে তার মাথা ক্রমেই পরিষ্কার হ'য়ে আসছে। সে এগিয়ে গিয়ে আবার এক ধাক্কা লাগালো। গাড়ী এবার লাইন থেকে বেরিয়ে কাত হয়ে পড়ল। খুব খানিক বান্‌বান্ করে উঠল—এতে সে ভয় পেল না। নিজের কৃতিত্বে বরং খুশীই হ'ল।

এক দিনের গবেষণায় সে অনেক জ্ঞান লাভ করেছে। মাথায় কেবলই ঘুরছে আর কি ভেঙ্গে চূরে দেওয়া যায়। কাছেই দেখে একটা টেলিগ্রাফের খুঁটি। এক ধাক্কা! অমনি টেলিগ্রাফের তার সমেত খুঁটি হেলে পড়ল।

পরদিন ষ্টেশনে মহা গোলমাল। রাতে বুনো হাতী এসে গাড়ী উল্টে দিয়েছে, টেলিগ্রাফের খুঁটি ভেঙেছে!

ফেশন মাস্টার, মাল-বাবু, তার-বাবু, কুলী—সকলে হট্টগোল করতে করতে যে সমস্ত জল্পনা-কল্পনা এবং মন্তব্য ক'রেছিল মহেশ্বরের কানে সে সব অবশ্য পৌঁছয় নি, কিন্তু সে নিকটেই জঙ্গলে গা-ঢাকা দিয়ে লোকজনের ভীড় দেখছিল, আর হয়ত, মনে মনে বলছিল “এখনই হয়েছে কি, দু-দশ দিন সবুর কর, আরও কি করি দেখবে!”

অভিজ্ঞতা থেকে মহেশ্বর বুঝেছে গাড়ী ওন্টানোর চেয়ে টেলিগ্রাফের খুঁটি ভাঙ্গা ঢের সোজা। আর বুঝেছে লগুভগু করার অভিযানে দিনের বেলায় না বেরিয়ে রাতে বেরোনই ভাল।

এখন থেকে আসাম-বেঙ্গল রেল-লাইনে ক্রমাগতঃ হাতীর উৎপাত শুরু হ'ল। দিনকয়েক চুপচাপ, আবার এক রাত্তিরে গোটা-কয়েক খুঁটি ভেঙ্গে দিয়ে জঙ্গলের মধ্যে চলে যায়।

টেলিগ্রাফের খুঁটি ভাঙ্গা এক-ঘেয়ে লাগছে, এই রকম মনের অবস্থায় এক রাত্তিরে লাইনের অনেকগুলো কাঠের শ্লিপার উন্টে দিয়ে গেল। লাইন জখম হওয়ার ফলে ট্রেন চলাচল বন্ধ হয়ে থাকল। রেল-কর্তৃপক্ষ ব্যতিব্যস্ত হ'য়ে উঠলেন। এ-দেশ সে-দেশ থেকে বড়বড় শিকারী এলেন গুণ্ডা হাতী মারবার জণ্ডে। কিন্তু গুণ্ডা হাতীর সন্ধান পাওয়া গেল না। সে বেশ কিছুদিন চুপচাপ থাকে—সকলেই মনে করে, হাতী এ দিক থেকে চলে গিয়েছে; হঠাৎ এক রাত্তিরে এসে আবার উৎপাত ক'রে রাতারাতি

জঙ্গলে চলে যায়। সমস্ত শীতকাল ধরে মহেশ্বরের এই কাণ্ড চলল। শিকারীরা লোকজন নিয়ে জঙ্গল ভাঙ্গলেন, পাহাড়ীরা বখশিসের লোভে এখানে ওখানে বাঁশের ঝাড়ে, কলাগাছে এবং হাতীতে আর যে সমস্ত গাছ খেতে ভালবাসে সেই সমস্ত গাছে বিষ মাখিয়ে রাখল। দিনের পর দিন গেল, মাসের পর মাস কাটল, কিন্তু মহেশ্বরের কেউ-ই কিছুই করতে পারল না।

চৈত্র মাসের শেষাংশে গরম পড়তে আরম্ভ হ'ল। দেখতে দেখতে জঙ্গলের গাছ-পালার পাতা ঝরে গেল। গ্যাড়া জঙ্গলে মহেশ্বরের লুকিয়ে থাকার অসুবিধে হয়ে উঠল—সে উত্তর দিকের পথে অজানা দেশের উদ্দেশে রওনা হ'ল।

অনেক দিন পর্যন্ত আর কোন উৎপাত নেই দেখে সকলেই ভাবল, যাক গুণ্ডাটা নিশ্চয়ই মরেছে,—অনুভূতঃ এ দেশ ছেড়ে চলে গেছে।

## ভের

গ্রীষ্মের পর বর্ষা ফি বছর যেমন হয়ে থাকে, এ বছরও তেমনি বর্ষা নামূল। মহেশ্বর দক্ষিণ মুখে ফিরল। বনের পর বনের শেষ নেই, এক পাহাড় পার হয়ে আর এক পাহাড়। —সে মণিপুরের সীমানায় উপস্থিত হ'ল। এ অঞ্চল কিন্তু তার কাছে নতুন। প্রথমেই দেখে পাহাড়ের গায়ে গায়ে নাগা চাবীরা চাষ করেছে। ক্ষেতে ধানের গাছ হয়েছে। পেট ভ'রে ধান গাছ খেল, আর মনের আনন্দে চার পা দিয়ে চাষ নষ্ট করল—তারপর ভোর হলে : জঙ্গলে চলে গেল। সে যেখানে দাঁড়িয়েছিল, তারই খানিকটা দূরে পরিষ্কার পাকা রাস্তা। এ রাস্তা দিয়ে মোটর-বাস্ যাতায়াত করে। রাস্তাটা হচ্ছে মণিপুর রোড। ষ্টেশন থেকে মণিপুরের রাজধানী ইম্ফল যাবার রাস্তা। রেলের ষ্টেশনের নাম মণিপুর রোড। এর আসল নাম 'ডিমাপুরা'। মহাভারতে যে হিড়িম্বার কথা পাওয়া যায়, সেই হিড়িম্বার বাড়ী এই ডিমাপুরায়।

ইম্ফল যাবার রাস্তা এবং রাস্তার আশে পাশের দৃশ্য খুবই সুন্দর। রাস্তার দু'ধারের জঙ্গল এত ঘন যে দিনের বেলায়ও তার মাঝে অন্ধকার জমাট বেঁধে থাকে। কোথাও খাড়া উঁচু পাহাড়, কোথাও নদী, কোথাও ঝরনা, কোথাও





এক মুহূর্তে বাস্টাকে উল্টে দিয়ে..... ৬২

বা গভীর খাদ। জঙ্গলে বাঘ, বুনো শূয়োর, বুনো কুকুর প্রচুর। তা' ছাড়া দলে দলে হাতী।

এই ধরনের পাকা রাস্তা মহেশ্বর আর কখনও দেখে নি। সে চেনে জঙ্গলের পথ,—পরিষ্কার পরিচ্ছন্ন চওড়া রাস্তার সঙ্গে তার পরিচয় ছিল না। রাস্তা দেখে, সে আর কিছু বুঝতে না পারলেও এটুকু বুঝল যে, এ-ও মানুষের তৈরী জিনিস।

বেলা হ'লে,—দেখল, একখানা মোটর বাস রাস্তা দিয়ে যাচ্ছে। মোটর বাসও মহেশ্বরের কাছে নতুন জিনিস। চেহারাটা, তার আগের-পরিচিত রেলপাড়ীর মত নয়, এবং তার তর্জ্জন-গর্জ্জনও তত জোরালো নয়। মহেশ্বর বাস-খানার দিকে তেড়ে গেল। বাস থেমে গেল, কারণ পাশ কাটিয়ে যাবার মত চওড়া রাস্তা নয়। লোকজন ভয়ে চীৎকার করতে করতে যে যে-দিকে পারল পালালো। এক মুহূর্তে বাসটাকে উল্টে দিয়ে সমস্ত লণ্ডভণ্ড ক'রে মহেশ্বর বেশ নির্বিবকার চিন্তে গাছপালা খেতে খেতে জঙ্গলে ঢুকে গেল। মনে মনে ভাবছিল ট্রেন ওল্টানোর চেয়ে বাস ওল্টানো ঢের সোজা।

পথে আরও কিছু কিছু গুণ্ডামি করতে করতে সে আসাম-বেঙ্গল রেল-পথের দিকে এগুতে লাগল। এ দিক্কার পথ তার চেনা পথ না হ'লেও আন্দাজে আন্দাজে সে চলেছে।



ভোরে, বনের মধ্যে ছোট একটা নদীতে স্নান সেরে, আচ্ছা ক'রে কাদা মেখে, খানিক বিশ্রাম ক'রে আবার সে ধীরে স্তব্ধ চলতে আরম্ভ করল। চলতে চলতে শেষে সে তার সেই আগের পরিচিত রেল-লাইনের কাছে এল।

অনেক দিন কোন উপদ্রব হয় নি। কিন্তু যারা বুনো গুপ্তা-হাতীর স্বভাব জানে তাদের বরাবরই ভয়, আবার কবে উৎপাত আরম্ভ হবে। রেলের কর্তৃপক্ষ লাইনের দুই ধার দিয়ে খাদ কাটিয়ে রেখেছিলেন। হাতীতে এ-রকমের খাদ পার হতে পারে না—কেননা, হাতী ছুটতে পারে, লাফাতে পারে না। মাঝে মাঝে শক্ত বেড়াও দেওয়া হয়েছিল—বেড়ার বাইরের দিকে তীরের ফলার মত বাঁশের ফলা। মাটিতেও অনেক জায়গায় শাল, সেগুন এবং বাঁশের গাঁজ পোঁতা হয়েছিল—এ রকম ছুঁচলো গাঁজের উপর দিয়ে হাতী চলতে পারে না।

মানুষের বুদ্ধির কাছে তাকে হার মানতেই হ'ল। অনেক চেষ্টা করেও সে আর লাইনের কাছে এগুতে না পেরে জঙ্গলে ফিরে গেল।

## চৌদ্দ

অনেক দিন মল্লিক সাহেবদের খবর নেওয়া হয় নি। আসাম-বেঙ্গল রেল-পথে গুণ্ডা হাতীর 'উপদ্রবের কথা সকলেই শুনেছে। রেল-লাইন থেকে কারখানার বাংলো অনেক দূর হ'লেও এই উপদ্রবের খবর মল্লিক সাহেবরাও শুনেছেন। বীণা বলে, এ হাতী মহেশ্বর না হ'য়ে যায় না। এ বার মল্লিক সাহেবেরও আন্দাজ তাই। তবে তিনি ঠিক বুঝে উঠতে পারেন নি মহেশ্বর এ-রকম ভীষণ দুর্দান্ত গুণ্ডা হ'ল কি ক'রে। বুনো হাতী যতক্ষণ দলে থাকে গুণ্ডা হয় না। দলছাড়া হ'লে দাঁতাল হাতী অনেক সময় গুণ্ডা হয়ে যায়। সে রকম গুণ্ডার অত্যাচার সাধারণতঃ দু'দশ দিনের বেশী হয় না। এ হাতী যেন মতলব এটে গুণ্ডামি করছে মনে হয়। এক সময় এ মানুষের কাছে থেকে বিচ্ছে বুদ্ধি শিখেছে, 'তারপর গুণ্ডামি করছে—তা' না হ'লে এমনটা হয় না।

পোষা হাতী, মানুষের কাছে নির্যাতন পেয়ে, কোনও গতিকে বুনো হ'য়ে গেলে, অনেক সময় যে বে-পরোয়া গুণ্ডা হয়ে ওঠে, তা ঠিক। কিন্তু মহেশ্বর ষত দিন বোস সাহেবের কাছে ছিল, তত দিন খুব যত্নেই ছিল। তবে,

মহেশ্বর এমন গুণ্ডা হ'ল কেন, তার কারণ অনেক দিন পর্যন্ত মল্লিক সাহেব আন্দাজ করতে পারেন নি। শেষে অণ্ড একটা ঘটনা থেকে মহেশ্বরের গুণ্ডা হওয়ার কারণ কতকটা বোঝা গেল।

কারখানার কাজ তদারক ক'রে বাংলায় ফিরে মল্লিক সাহেব শুনলেন, তিন দিনের পথ থেকে জন কয়েক পাহাড়ী তাঁর কাছে এসেছে। তারা বলছে, তাদের গ্রামে একটা বাঘ ভয়ানক অত্যাচার করছে। গোকু, মোষ মেরেছে, একজন মানুষকেও দিনের বেলায় ধ'রে নিয়ে গিয়েছে।

লোকজন, হাতী, তাঁবু, বন্দুক প্রভৃতি শিকারের সরঞ্জাম নিয়ে, পরদিন মল্লিক সাহেব পাহাড়ীদের গ্রামে রওনা হ'লেন। বছরে দু'এক বার তাঁকে এরকম বাঘ-শিকারে যেতে হয়।

সেখানে গিয়ে অনেক চেষ্টা করেও বাঘের সন্ধান পাওয়া গেল না। এদিকে বাংলায় ফিরতে দেবী হয়ে যাচ্ছে, চটপট্ একটা হেস্ট নেস্ট করা দরকার। ঠিক হ'ল গর্ত কেটে, বাঘ ধরবার চেষ্টা করা হবে। এ ভাবে বাঘ-শিকার করতে হলে, গভীর গর্ত কেটে তার উপরটা চেরা-বাঁশ এবং ডাল পালা দিয়ে ঢেকে, সেখানে ছাগল অথবা অণ্ড কোন শিকার বেঁধে রাখা হয়। নির্জজন জায়গায় বে-ওয়ারিশ শিকার পেয়ে, বাঘের নিশ্চয়ই খুব লোভ হয়। তারপর শিকারের উপর ঝাঁপিয়ে পড়লেই, বাঘের ভারে ঢাকনির বাঁশ ভেঙ্গে বাঘ গর্তে প'ড়ে যায়।

গর্ত কাটার কথা ঠিক হ'লে গ্রামের লোকেরা বলল, বছর দুই আগে একটা হাতী ধরার জন্মে গর্ত কাটা হয়েছিল, সেই গর্তে যদি কাজ চলে, তা হ'লে নতুন ক'রে আর গর্ত কাটার হাঙ্গামা করতে হয় না। খোঁজ-খবর নিয়ে মল্লিক সাহেব যা শুনলেন তাতে তাঁর খুব সন্দেহ হ'ল, নাথুরাম এখানে এসে মহেশ্বরকে ধ'রেছিল। তাই যদি হয়, সে তাঁদের কোম্পানীর হাতী-চোর। তার হাত থেকে, পালাবার পর মহেশ্বর যদি গুণ্ডা হয়ে গিয়ে থাকে তা হলে তার গুণ্ডা হওয়ার জন্মে নাথুরামই দায়ী। তাঁর এ সন্দেহ তিনি আপাততঃ নিজের মনে রেখে, সে যাত্রায় বাঘ মেরে তাড়াতাড়ি বাংলায় ফিরে এলেন।

তাঁর সন্দেহের কথা শিলংএর পুলিশকে জানালে, পুলিশ নাথুরামকে নিয়ে খুব টানা-হ্যাঁচড়া আরম্ভ করল। অনুসন্ধানের ফলে যে সমস্ত প্রমাণ পাওয়া গেল, তা' থেকে নাথুরাম স্বীকার করতে বাধ্য হ'ল যে, সে বছর দুই আগে গর্ত কেটে একটা বড় দাঁতাল হাতী ধরেছিল, তবে সেটা একটা বুনো হাতী, মহেশ্বর নয়। মহেশ্বরকে সে চিন্ত, সে হাতী মহেশ্বর কখনই নয়।

পুলিশ জিজ্ঞেস করল, সে হাতী এখন কোথায় ?

নাথুরামের জবাব ঠিক করাই ছিল ; বলল—ধরবার মাস দুই পরে এক সাহেবের কাছে তাকে বিক্রী করে দিয়েছি।

নাথুরাম বোকা নয়। পুলিশ তাকে কি কি কথা জিজ্ঞেস করতে পারে, আন্দাজ ক'রে তার জবাবও সে ঠিক করে

রেখেছিল। এত বড় একটা কাণ্ড করবার আগে, আট-ঘাট বেঁধেই করেছে—হাতে কলমে ধরা পড়বার কোন প্রমাণ রাখে নি। সে জানে চুরি বিদ্ধে বড় বিদ্ধে যদি না পড়ে ধরা।

পুলিশ আরও প্রমাণ সংগ্রহের চেষ্টা করতে লাগল। তারাও না-ছোড়-বান্দা। এখানে সেখানে তদন্ত ক'রে এবং মাঝে মাঝে এসে নাথুরামকে জেরার উপর জেরা ক'রে হয়রান করল। মল্লিক সাহেব উৎসাহী হ'য়ে পুলিশকে নানা রকমে সাহায্য করলেন।

আরও কিছু কিছু প্রমাণ সংগ্রহ হলে, নাথুরামের নামে হাতী-চুরীর মামলা হ'ল। তাকে গ্রেপ্তার ক'রে আদালতেও হাজির করা হ'ল। কিন্তু নিশ্চিত ভাবে, প্রমাণ করা গেল না যে, যে-হাতী সে ধ'রেছিল সে মহেশ্বর। সাক্ষী-সাবুদ দিয়ে বিচারকের কাছে তাকে দোষী সাব্যস্ত করা গেল না—কাজেই শেষ পর্যন্ত নাথুরামের কোন শাস্তি হ'ল না।

## পনের

নাথুরাম বে-কসুর খালাশ পেয়ে গেল। মহেশ্বরকে সে এক সময় কিনতে চেয়েছিল। বোস্ সাহেব তাকে বিক্রী করতে চান নি, সেই রাগে সে বোস্ সাহেবকে জব্দ করবার জন্যে মহেশ্বরের দাঁত দুটো কেটে নেবার মতলব ক'রেছিল। সে, অনেকদিন আগের ঘটনা। এবার পুলিশের হাঙ্গামায় প'ড়ে, তার রাগ হ'ল বেশী করে মল্লিক সাহেবের উপর। তিনি এর মাঝে না থাকলে পুলিশে কিছু আর আপনা থেকে তাকে হাতী চুরির মামলায় জড়াতো না। আর এমন ক'রে নাকানি-চোবানিও খেতে হ'ত না।

নাথুরাম হাড়ে-হাড়ে চালাক। মল্লিক সাহেবের উপর তার বিন্দুমাত্র রাগ হয়েছে—এমন ভাব বাইরে প্রকাশ হ'তে দিল না। এমন কি, আগের চেয়ে এখন সে তাঁকে বেশী বেশী করে খাতির দেখাতে লাগল—হাটে বাজারে কোথাও দেখা হ'লে খুব লম্বা লম্বা সেলাম ঠোকে, আর এমন ভাব দেখায় যেন সে তাঁর দাসানুদাস—কেনা গোলাম। একেই বলে অতি ভক্তি চোরের লক্ষণ।

মাস ছয়েক এই ভাবে কেটে গেল। আবার একদিন মংলার ডাক পড়ল নাথুরামের কাছে। থোক পাঁচশো টাকা বখশিস পাবে,

ঠিক হ'ল যদি সে মল্লিক সাহেবের বাংলা থেকে তাঁদের মেয়ে খুকীকে চুরি ক'রে আনতে পারে। এক সঙ্গে পাঁচশো টাকা, মংলা ভাবতেও পারে না। নাথুরামের জ্বিদ, যেমন করেই হ'ক এ কাজ তাকে করতেই হবে, তাতে যত টাকা লাগে লাগুক। নাথুরাম চায়, এতবড় ভয়ানক কাজটা মংলাকে দিয়ে করাবে, নিজে ধরা-ছোঁয়ার মাঝে থাকবে না—পুলিশের ভয় আছে। চারিদিকে লোকজনের চোখ এড়িয়ে বাংলা থেকে খুকীকে চুরি করা সোজা কাজ নয়—মংলারও ধরা পড়ার ভয় আছে।

দু'জনে মিলে মোটামুটি এক মতলব ঝাঁটল। মল্লিক সাহেব এবং বীণা মাঝে মাঝে হাতী চ'ড়ে জঙ্গলে বেড়াতে যান। খুকী তখন আয়ার কাছে থাকে। আয়াকে হাত করতে পারলে কাজ সোজা হয়। কিন্তু নাথুরাম আর-কাউকে এর মাঝে আনতে চায় না—ব্যাপারটা তাতে প্রকাশ হয়ে যাবার সম্ভাবনা। খুকীকে চুরি ক'রে এরা মেয়ে ফেলতে সাহস করে না। ধরা পড়লে ফাঁসী-কাঠে বুলতে হবে। দূরে কোথাও কোন গভীর জঙ্গলে তাকে ছেড়ে দেবে, তার পর বাঘ-ভালুকে খেয়ে ফেলবে। সাপও মরবে লাঠিও ভাঙবে না।

সমস্ত ঠিকঠাক—পাকা কথা হয়ে গেল। মংলা কিছু টাকা আগাম নিয়ে, খেয়ে দেয়ে ফুর্তি করতে লেগে গেল। আর মাঝে মাঝে বিকেলের দিকে গোপনে গোপনে কারখানার বাংলার আশে-পাশে ঘুরে বেড়ায়—ফাঁক পেলেই খুকীকে নিয়ে পালাবে।



তখন বিকেল বেলা। মল্লিক সাহেব জঙ্গলে গাছ কাটার তদারকে গেছেন, বাংলায় ফিরবার সময় হয় নি। খুকী নিজের মনে ঘুরে ফিরে খেলা করে বেড়াচ্ছে। আয়া ব'সে একমনে উল দিয়ে কি-একটা বুনছে। এই সময় রোজই প্রায় সে খুকীকে খেলা করতে ছেড়ে দিয়ে উল বোনে। কেউ জানে না, আজ মংলা নিকটেই হিংস্র বাঘের মত শিকারের অপেক্ষায় ওৎ পেতে আছে।

খুকী তার খেলার গাড়ীতে পুতুল বসিয়ে মহা আনন্দে গড়-গড় ক'রে টেনে নিয়ে বেড়াচ্ছে। গাড়ী টানতে টানতে বনের দিকে একটু বেশী এগিয়ে গিয়েছে। আয়া উল বোনায় মত্ত—খুকীর দিকে তত খেয়াল নেই—অভ্যাস মত কেবল সে মাঝে মাঝে “খুকী”—ব'লে ডেকে সাড়া নিচ্ছে।

বার-কয়েক এই রকম “খুকী”—“খুকী” ক'রে ডেকে, আয়ার মনে হ'ল অনেকক্ষণ খুকীর সাড়া পাওয়া যায় নি। সামনে, পাশে, চারিদিকে তাকিয়ে দেখে কোথাও খুকী নেই। দৌড়ে বাংলায় গেল, সেখানেও খুকী নেই। খোঁজ-খোঁজ প'ড়ে গেল, কোথাও তাকে পাওয়া গেল না। খুকীর মা বীণার ছুশ্চিন্তার শেষ নেই,—জঙ্গলের দিকে লোকজন পাঠিয়ে দিলেন। মল্লিক সাহেব বাংলায় ফিরে খুঁজতে বেরিয়ে গেলেন। কৃষ্ণপক্ষের রাত, অন্ধকার গাঢ় হয়ে উঠল। যারা খুঁজতে বেরিয়েছিল, অনেক রাত্রে তারা একে একে ফিরে এল, খুকীর সন্ধান হ'ল না।

খুকীকে বাঘে নিয়ে গেছে,—প্রথমে সকলের এই কথাই

মনে হয়েছিল। কিন্তু, তা' যদি হ'ত যে রকম তন্ন তন্ন করে খোঁজা হয়েছে, তার মৃত দেহ পাওয়া যেত নিশ্চয়ই। রক্তের দাগ, রাঘের পায়ের চিহ্ন, খুকীর কাপড়-চোপড় কিছুই কোথাও পাওয়া গেল না। উদ্বেগ আর দুর্ভাবনায় সে রাত্রিতে কারও ঘুম হ'ল না।

পরদিন সকলে আবার খুঁজতে বেরুলো। মল্লিক সাহেব এবং বীণাও একটা হাতীতে চ'ড়ে বেরুলেন—ফল কিছুই হ'ল না। ক্রমে সকলের এই ধারণাই হ'ল যে, খুকীকে কোন হিংস্র জন্তুতে নিয়ে যায় নি।

মল্লিক সাহেব যতই ভাবছিলেন, ততই তাঁর মনে হচ্ছিল, নিশ্চয়ই এ নাথুরামের কাজ। এই মাস-কয়েক আগে হাতী-চুরীর মামলায় প'ড়ে তার অনেক দুর্গতি হয়েছে। নাথুরাম সেই রাগে হয় ত এই কাণ্ড করিয়েছে, খুকীকে সে চুরী করিয়ে নিয়ে গিয়েছে। তাকে কি সে মেরে ফেলল—না, কোথাও আটকে রেখেছে ?

এই সমস্ত এলো মেলো কত কি ভাবতে ভাবতে তাঁর স্থির মাথা অস্থির হয়ে উঠল। তাঁর ইচ্ছে হচ্ছিল, এই মুহূর্তেই ছুটে গিয়ে নাথুরামের টুটি টিপে ধরবেন। যদি সে খুকীকে ফিরিয়ে না দেয়, নাথুরামকে তিনি গুলি ক'রে মেরে ফেলবেন। তারপর যা হয় হবে। দুর্দান্ত কল্পনা শান্ত হ'লে ভাবলেন এ সমস্ত কি বা' তা' পাগলের মত ভেবে সময় নষ্ট করছেন।

তিনি বাংলোর ভিতর কামরায় ঢুকে দেখেন বীণা এ-ঘর-ওঘর ক'রে বেড়াচ্ছে।

## শোল

পুতুল নিয়ে গাড়ী-গাড়ী খেলতে খেলতে খুকী অনেক খানি দূরে চলে গেল—এ-রকম সে গিয়ে থাকে। অগুদিন হয় সে আয়ার ডাকাডাকিতে নিকটে এসে খেলা করতে থাকে,—না-এলে আয়া তাকে ধরে নিয়ে আসে। এদিন আয়া উল বোনা নিয়ে মেতেছিল। মংলা কাছেই লুকিয়েছিল। আয়ার মন অগুদিকে, খুকীও তফাতে এসে পড়েছে এই স্বেযোগে সে খুকীর উপর বাঘের মত ঝাঁপিয়ে পড়ল। এক হাত দিয়ে তাকে জাপটে ধ’রে, যাতে চেষ্টাতে না পারে সেই জন্মে আর এক হাতে মুখ চেপে ধ’রে দৌড়ে জঙ্গলে ঢুকে গেল। আয়া এর কিছুই জানল না।

মংলা দৌড়ছে, অসহায় শিশু হাত পা ছুঁড়ছে। এমনি ক’রে ঘন বনে তারা অনেক দূর এগিয়ে পড়ল। বনের পথ এমনিতেই অন্ধকার, তার উপর সন্ধ্যাও হয়ে গেল। নিশাচর প্রাণী ছাড়া এ পথে কেউ চলা-ফেরা করতে পারে না। মংলা সে হিসাবে নিশাচর। তা’ না হলে রাতের বেলায় একরকম জঙ্গলে কেউ চলতে সাহসও করে না। এখন সে খুকীর মুখ ছেড়ে দিয়েছে,—সে চীৎকার করে কাঁদছে, সে কান্না আর মানুষের কানে পৌঁছানোর সম্ভাবনা নেই। অনেকক্ষণ সে কাঁদল, চেষ্টালো, মংলাকে দুটো চারটে কিলও মারল। তারপর কাঁদতে কাঁদতে দুর্বল হয়ে ঘুমিয়ে পড়ল।

মংলা ঘুমন্ত খুকীকে নিয়ে, একটা গাছের উপরে রাত কাটালো। সকাল বেলা খুকীর যখন ঘুম ভাঙ্গল তখন সে আপনা থেকেই অনেকটা শান্ত হয়েছে। এইবার মংলা যত্ন ক'রে তার হাত মুখ ধুইয়ে তাকে দুধ খেতে দিল। কিছু দুধ, চিঁড়ে এবং মিষ্টি সে সঙ্গে করে এনেছিল। এ বনে জলের অভাব নেই, নিজের গামছা ভিজিয়ে খুকীর হাত মুখ মুছিয়ে দিল। খুকীর খুব খিদে পেয়েছিল, যা পেল খেয়ে কতকটা সুস্থ হ'ল।

খুকীকে শান্ত করার দরকার ছিল। কাঁদা-কাটি ক'রে বাগ্গাট বাধালে তাকে নিয়ে চলা অসুবিধে। মংলা সেই বুঝেই তাকে শান্ত করতে চেষ্টা করছিল। তাকে খুশী করবার জন্মে একটা গল্পও বলল—খুকী তার কতক বুঝল কতক বুঝল না। অন্য দিন গল্প শুনতে তার ভাল লাগে - কিন্তু আজ মা-বাবার জন্মে মন খারাপ। সে বলল—মার কাছে যাব। মংলা তাকে ভোলা-বার জন্মে বলল—তাই চল, মার কাছে নিয়ে যাই।

খুকী কিছুই বুঝতে পারছে না—মংলা তাকে ধ'রে আনল কেন। সে যখন তার মুখ চেপে ধ'রে দৌড় দিল, তার বড্ড কষ্ট হচ্ছিল। নিঃশ্বাস বন্ধ হয়ে আসছিল—ভাল করে কাঁদতেও সে পারছিল না। মংলা বড় খারাপ লোক—মার কাছে নিয়ে গেলেই সে মাকে বলে ওকে আচ্ছা রকম বকুনি খাওয়াবে। এই রকম কত কি সে ভাবল।

আরও এক রাত কাটল। মংলা আরও গভীর জঙ্গলে এসে পড়ল। মহেশ্বর গুণ্ডা হয়ে কিছুদিন এই জঙ্গলের আশে পাশে

ঘুরে বেড়িয়েছিল—সে আজ বছর দুই-এর কথা। এখন সে কোথায় কি ক'রে বেড়াচ্ছে কে জানে। সে বার ত সে তাকে মেরেই ফেলেছিল—একটুর জন্মে বেঁচে গিয়েছিল।

এই জঙ্গলটা পার হয়ে যেতে তার মত লোককেও নাকাল হতে হ'ল। সে হাঁপিয়ে উঠল। কাঁটা গাছে শরীরের অনেক জায়গায় ছড়ে গিয়ে রক্ত বেরিয়ে গেল। খুকীকে নামিয়ে রেখে সে দম নিল। আর খানিকটা যেতে পারলেই পরিষ্কার মাঠ পাওয়া যাবে।

দম নিতে নিতে গায়ের রক্ত মুছে, এমন সময় সামনের খোলা মাঠের ধারে, যা দেখতে পেল তাতে তার মাথা ঘুরে গেল। মট্ মট্ ক'রে বাঁশ ঝাড় ভাঙ্গবার শব্দ শোনা গেল। তার পরই চোখে পড়ল, প্রকাণ্ড এক দাঁতাল হাতী। মহেশ্বর মনের আনন্দে বাঁশের কোঁড় ভাঙছে আর খাচ্ছে।

এতক্ষণে মংলার হুঁস হ'ল যে সাক্ষাৎ যমের হাতে সে প'ড়েছে—এবার আর নিস্তার নেই। মহেশ্বরের উপর যত অত্যাচার করেছে, আজ সে তার শোধ তুলবে। মংলা একটা মোটা গাছের আড়ালে গেল। সেখান থেকে এ গাছের ও গাছের মাঝ দিয়ে পালাতে লাগল। মহেশ্বর, বাঁশের কোঁড় মহা আনন্দে খেয়ে শুঁড় উপরে তুলে একটা চীৎকার দিল। সে যেন মংলাকে দেখেও দেখছে না। মনে মনে কিন্তু বেশ জানে এবার আর পালাবার জো নেই। মংলা খুকীকে ফেলে, যে পথে এসেছিল, সেই মুখো ফিরে দৌড় দিল। কাঁটা-

বন, বেশীদূর এগুতে পারল না। মহেশ্বর তাড়া করে আসছে, আর সে পালাতে চেষ্টা করছে। পাঁচ-দশ-পনের মিনিট এই ভাবে কার্টল—মহেশ্বর মাঠ পার হ'য়ে এসে পড়েছে। মংলা প্রকাণ্ড একটা গাছের ডাল ধ'রে উপরে উঠে গেল। মহেশ্বর ঝড়ের মত ছুটে এসে শুঁড় দিয়ে ডালটা ভেঙ্গে ফেলল। মংলা ছিটকে একেবারে তার পায়ের কাছে পড়ল। পরক্ষণেই মহেশ্বরের সামনের পায়ের এক চাপে তার সব শেষ হয়ে গেল।

কি ভয়ানক কাণ্ড হয়ে গেল। খুকী তা কিছু বুঝল না— তার বোঝবার বুদ্ধি হয় নি। সে শুধু দেখল একটা হাতী। হাতী সে চেনে। মাঝে মাঝে কারখানায় শান্ত-শিষ্ট হাতীতে উঠে বেড়াতে যেয়ে থাকে। মংলা তাকে ধ'রে আনবার পর থেকে এ পর্যন্ত কোন জানাশুনো জিনিস তার চোখে পড়ে নি। এখন একটা জন্তু সে দেখতে পেল যে জন্তু সে চেনে, যার পিঠে উঠে সে বেড়ায়, নিজের হাতে যাকে খেতে দেয়। জন্তুটা অত বড় হ'লেও তার ভয় হ'ল না। সে মহেশ্বরের দিকে এগিয়ে গেল—তাকে ডাকতে লাগল।

দুর্গম জঙ্গলে এ শব্দ মহেশ্বরের কাছে অদ্ভুত লাগল। সে থমকে দাঁড়ালো। অনেক দিনের ভুলে-যাওয়া একটা অস্পষ্ট ছবি তার মনে ভেসে উঠল। এই রকমই একটা ছোট্ট মেয়ে তার শুঁড় ধ'রে টেনে বসাতে চেষ্টা করত। খুকী আরও একটু এগিয়ে এলে, মহেশ্বর শুঁড় দিয়ে তাকে বারবার ছুঁয়ে দেখতে লাগল। তার গায় মানুষের গন্ধ, কিন্তু যে মানুষের অত্যাচারে তার মন

বিষাক্ত হয়ে আছে, এ সে রকম গন্ধ নয়। তার বাচ্ছাকালে এমনি একটা ছোট্ট মানুষ তাকে আদর ক'রে খেতে দিত। মাঝে মাঝে রেগে শুঁড়ের উপর কিল-চড় মারত—তার কত ভাল লাগত। মহেশ্বরের সে দিনগুলোর কথা যদিও ভাল ক'রে মনে পড়ে না—তবুও তা সে একেবারে ভুলে যায় নি। অতবড় গুণ্ডা জানোয়ার, যার অত্যাচারে সমস্ত আসাম তোলপাড় হয়ে উঠেছে, একটা ছোট্ট শিশুর কাছে সে পোষা বেড়ালের মত শান্ত হয়ে গেল। মহেশ্বর খুকীর গায়ে মাথায় অনেকক্ষণ ধরে শুঁড় বুলালো—চোখ বুজে কত কি ভাবল—তারপর অতি সাবধানে খুকীকে পিঠের উপর তুলে নিয়ে বনের পথে ধীরে স্তব্ধে আস্তে আস্তে চলতে লাগল।

মহেশ্বর চলেছে ত' চলেইছে, কোথায় যাচ্ছে, কোন্ দিকে যাচ্ছে—নিজেই তা ভাল ক'রে জানে না। খুকীকে নিয়ে কোথায় রাখবে, কি খেতে দেবে মানুষের মত এ সমস্ত ভাবনা তার মনে নেই। তার বন্য প্রকৃতি, তার অভ্যাস, তাকে যে দিকে টেনে নিয়ে যাচ্ছে সে সেই দিকেই চলেছে। শেষ পর্যন্ত কোথায় পৌঁছবে জানে না।

কিন্তু পথ তার ভুল হয় নি। মংলা যে পথে এসেছিল, সেই পথে সে ফিরে চলল। শিকারী কুকুর যেমন ক'রে গন্ধ শুঁকে বুঝতে পারে শিকার কোন দিক দিয়ে পালিয়েছে, মহেশ্বরও ঠিক তেমনি ক'রে মংলার পায়ের গন্ধ ধ'রে ধ'রে চলতে লাগলো, মল্লিক সাহেবের কারখানার বাংলোর দিকে।



খুকী এই কয় দিনে দুর্বল হয়ে পড়েছে—তবুও তার ভালই লাগছিল, অগুদিন যেমন সে হাতী চ'ড়ে বেড়িয়ে বেড়ায় এও ঠিক তেমনি মনে হচ্ছিল। তার কাছে জঙ্গলের ভয়, মংলার ভয় কিছুই এখন আর নেই। মহেশ্বরেরও মনের মধ্যে এইটুকু সময়ের মাঝে একটা প্রচণ্ড ওলট-পালট হয়ে গেছে। এক সময়ে সে মানুষের আওতায় ছিল। তাদের অত্যাচারের প্রতিশোধ নেবার জন্মে গুণ্ডা হয়ে গিয়েছিল। প্রতিশোধ পুরোমাত্রায় নেওয়া হয়েছে, তবুও সে শান্তি পেল না—তাকে গুণ্ডামির নেশায় পেয়ে বসেছিল—এ নেশার শেষ ছিল না। খুকীকে কাঁধের উপর তুলে নিয়ে চলেছে, তার স্পর্শে সে যেন তার অনেক দিনের সেই পুরোনো জীবন ফিরে পেল।

জঙ্গলের ভিতর দিয়ে চলতে চলতে মাথার উপরের ডাল-পালায় বেধে খুকী প'ড়ে যেতে পারে। মহেশ্বর আগে থেকেই তাই ডাল-পালা ভেঙ্গে পথ পরিষ্কার ক'রে দিচ্ছে। একপাল হরিণ পাশ দিয়ে দৌড়ে পালিয়ে গেল, খুকী খুশী হয়ে হাততালি দিতে লাগল।



## সতের

খুকীর কোনও খোঁজ পাওয়া গেল না। ছোট্ট একটি শিশুর অভাবে অত বড় বাংলোখানা একেবারে নিস্তব্ধ হয়ে রয়েছে—চারিদিকেই একটা অস্বাভাবিক চুপচাপ ভাব। এই ছোট্ট খুকীটাই সোরগোল ক’রে বাংলোখানা সকাল থেকে সন্ধ্যা পর্যন্ত মাতিয়ে রাখে। লোকজন যে যার কাজ করছে, মল্লিক সাহেব বেশী বেশী ক’রে কাজে ব্যস্ত থেকে দুশ্চিন্তা চাপা দিতে চেষ্টা করছিলেন।

আগের দিন রাত্রিতে বীণাকে ওষুধ খাইয়ে ঘুম পাড়িয়ে রাখা হয়েছিল। সকালে ঘুম ভাঙার পর অনেক বুঝিয়ে তাকে মাত্র একটু দুধ খাওয়ানো হয়েছে। খুকী নেই,—বাঘ-ভালুকে তাকে খেয়ে ফেলেছে এ কথা সে ভাবতেই পারে না। আছে—সে বেঁচে আছে—সে আবার ফিরে আসবে—আবার তেমনি ক’রে হাসবে, তেমনি করে তাকে মা ব’লে ডাকবে—এমনি ধারা নানান চিন্তা তার সারা মনটা জুড়ে ব’সে আছে।—এই আশাই তাকে বাঁচিয়ে রেখেছে—এরপর যত দিন বেঁচে থাকবে এই আশাতেই সে বেঁচে থাকবে।

সময় কারও দিকে চেয়ে দেখে না, কারও জন্যে অপেক্ষা করে না। দিন যায়, রাত আসে। কত রাজ্যের দুর্ভাবনা দুশ্চিন্তা

এক সঙ্গে ভীড় ক'রে অন্ধকার মনের এ-কোণে ও-কোণে উঁকি মারতে থাকে। রাত যায়—দিনের আলোতে তাদের চেহারা ঝাপসা হ'য়ে আসে। কখনও কাজে কস্মে নিজেকে খানিক হারিয়ে ফেলে, কখনও বা খানিক সত্য খানিক স্বপ্ন নিয়ে মানুষ দুঃখ কষ্ট সহ করে। তারপর যত দিন যায় একটু একটু করে গত জীবনের ঝড়-ঝাপটা—এমন কি মৃত্যুশোক ভুলতে থাকে।

মল্লিক সাহেবের ইচ্ছে বীণাকে কিছু দিনের জন্যে কলকাতায় তার বাবার কাছে পাঠিয়ে দেন। সেখানে আত্মীয়-স্বজন বন্ধু-বান্ধবের মাঝে কিছু দিন থাকলে মনের অবস্থা কতকটা স্বাভাবিক হয়ে আসবে। কিন্তু বীণা কিছুতেই রাজি হচ্ছে না। সে কেবলই বলছে—খুকী আছে। আমার মন বলছে সে বেঁচে আছে—সে ফিরে এলে, তাকে নিয়ে কলকাতায় যাব।

তিন দিন, তিন রাত কেটে গেল। আসামের জঙ্গল,—বাঘ, ভালুক, হাতী, সাপের রাজত্ব। তার মাঝে ছোট্ট একটা শিশু। বেঁচে আছে এ আশা দুরাশা। তবে নাথুরাম যদি শক্রতা ক'রে তাকে লুকিয়ে রেখে থাকে—একেবারে প্রাণে না মেরে ফেলে থাকে। সেই এক ক্ষীণ আশা।

আশা নিরাশায় কত কথা মনে আসছে, এমন সময় দূর থেকে একটা হৈ হৈ শব্দ শোনা গেল। শব্দ ক্রমেই নিকটে আসছে দেখে, মল্লিক সাহেব বন্দুক হাতে বেরিয়ে গেলেন। বীণা অন্যমনস্কভাবে একখানা বই নিয়ে নাড়া-চাড়া করছিল, মল্লিক সাহেবকে বেরিয়ে যেতে দেখে সে-ও বারান্দায় বেরিয়ে এল।


খানিক পরেই জন কয়েক কুলী দৌড়তে দৌড়তে এসে খবর দিল, মহেশ্বর আসছে। সমস্ত কুলী-মজুর ভয়ে যে যেদিকে পারছে পালাচ্ছে। মল্লিক সাহেব দেখলেন বিপদের উপর বিপদ। তিনি বীণাকে সাবধান করতে তাড়াতাড়ি বাংলোয় ফিরে এলেন। বীণা কিন্তু মহেশ্বর আসছে শুনে কিছুমাত্র ভয় পেল না—তার চোখে মুখে একটুও উদ্বেগের চিহ্ন দেখা গেল না।

মিনিট কয়েকের মধ্যে, পর্বতের মত বিরাট দেহ নিয়ে মহেশ্বর বাংলোর সামনে এসে থেমে গেল। লোকজন যারা ভয়ে পালা-চ্ছিল তাদের কেউ কেউ তাকে দূর থেকে দেখেছে, বাকী সকলে নাম শুনেই পালিয়েছে। তার ঘাড়ের কাছে যে খুকী বসে আছে তা কারো চোখে পড়ে নি। মল্লিক সাহেবও প্রথমে ব্যাপারটা বুঝতে পারেন নি। মহেশ্বর যে তাঁদের হারানো খুকীকে ফিরিয়ে আনবে, কোনও মতেই এ কল্পনা কেউ ক'রতে পারে না। তিনি বন্দুক হাতে একবার এগিয়ে যাচ্ছেন আবার অন্য দিকে সরে যাচ্ছেন, এমন সময় বীণা “খুকী—খুকী” বলে পাগলের মত চীৎকার করতে করতে মহেশ্বরের দিকে ছুটে গেল। মল্লিক সাহেব তাকে বাধা দেওয়ার সময় পর্য্যন্ত পেলেন না।

পরক্ষণেই বীণা তার সেই ছেলে বেলার মতন ক'রে চাঁচিয়ে বলল—

মহেশ্বর, বৈঠ্—বৈঠ্, যাও—বৈঠ্, যাও—বৈঠ্।

শান্ত শিষ্ট মহেশ্বর নিরীহ পোষা হাতীর মত হাটু গেড়ে বসে



খুকী তার উপর থেকে.....কাঁপিয়ে পড়ল। ৮২ পৃষ্ঠা।

পড়ল। খুকী তার উপর থেকে “মা—মা” বলে বীণার কোলে ঝাঁপিয়ে পড়ল।

গল্প এখানেই শেষ করা যেত। কিন্তু নাথুরাম এত কাণ্ড ক’রে, শেষে রাতারাতি আসাম থেকে পালিয়ে বাঁচল—এ খবরটা দেওয়া দরকার। মংলার শাস্তি মহেশ্বর নিজেই দিয়েছে। মহেশ্বর ফিরে এসেছে এ খবর মুখে মুখে ঘণ্টা খানেকের ভিতরে চার দিকে ছড়িয়ে প’ড়ল। নাথুরামও এ খবর পেল। এবার আর কোনও উকিলের কথার মার-প্যাঁচে রেহাই পাবে না। মহেশ্বরকে ধরবার পর তার গায়ে লোহা পুড়িয়ে নাথুরাম যে তার নিজের নাম আচ্ছা ক’রে দেগে দিয়েছিল এখনও তা’ স্পর্শ পড়া যায়। অস্বীকার করবার আর পথ নেই যে, সে মহেশ্বরকে ধরে নি।

জেলখানার হাত এড়ান অসম্ভব দেখে, নগদ টাকাকড়ি গদিতে যা ছিল তাই নিয়ে সে রাতারাতি পালিয়ে গেল। পুলিশ অনেক অনুসন্ধান করেও তাকে ধরতে পারে নি। হয়ত সে ঐ টাকায় আর কোথাও নাম বদলে অন্য কোন নামে ব্যবসা আরম্ভ করেছে।

আর, মহেশ্বর ? সে চিরকালের মত গুণ্ডামি ছেড়ে দিয়েছে। তাই বলে, মানুষের শিকল আর তার পায়ে ওঠে নি—যেমন স্বাধীন ছিল তেমনই স্বাধীন ভাবেই সে জীবন কাটাচ্ছে।

বছরে সে একবার ক’রে মল্লিক সাহেবদের পোষা হাতীর দলে কয়েক মাস কাটিয়ে যায়। তখন সে নিজের খেয়াল-মাফিক

মোটা-মোটা কাঠের গুঁড়ি পাহাড় থেকে গড়িয়ে দেয়। মালতীর ধার সে ধারে না—নিজেই ভলান্টিয়ার হ'য়ে কাজে লেগে যায়। তাকে এই সময় বিকেল হ'লে মল্লিক সাহেবের বাংলোর উঠোনে দেখা যায়—সে তখন পরম তৃপ্তির সঙ্গে বীণা এবং খুকীর দেওয়া তাল-তাল তেঁতুল খায়। খুকী বসতে বললে বসে, উঠতে বললে উঠে দাঁড়ায়। তার বুকের নীচে দিয়ে খুকী দোড়াদোড়ি করে—চার পায়ের আড়ালে লুকোচুরি খেলে। সে তার কান ধ'রে ঝোলে, আঁস্তু একখানা আঁথ দিয়ে আঁচ্ছা ক'রে মার দেয়। আরও কত অত্যাচার করে—মহেশ্বর কিন্তু কিছুই বলে না, বরং তাকে দেখে মনে হয়, সে যেন তাতে খুব খুশী হয়।

গরম প'ড়ে গেলে মহেশ্বর একটু একটু ক'রে চঞ্চল হতে থাকে। তারপর একদিন আর তাকে দেখা যায় না—সে উত্তর দিকে চলে যায়।

এমনি করে বছরের পর বছর মহেশ্বরের আসা-যাওয়া চলছিল। সে যখন ফিরে আসে সাড়া প'ড়ে যায় মহেশ্বর ফিরেছে। যখন চলে যায় কেউ জানে না কোথায় কোন্ দেশে সে যায়, আর কেনই বা যায়।

তারপর, এক বছর সে আর ফিরল না। অসভ্য জংলীদের বিশ্বাস, মহেশ্বর ইন্দ্রের ঐরাবত, হিমালয় পার হয়ে স্বর্গে ইন্দ্রের কাছে ফিরে গেছে—সে মরে নি।



এই গ্রন্থকারের—

## রেডিও ডাকাত

দাম ৯০ আনা

“প্রবাসী” বলেন—এই দুঃসাহসিকতার গল্পগুলি ছেলে-মেয়েদের মনে ধরিবে...সকলেরই ভাল লাগিবে।

“পাঠশালা” বলেন—ইনি (লেখক) ছেলে-মেয়েদের কল্পনাকে রূপ কথায় রাজ্য থেকে টেনে এনেছেন বর্তমান জগতের বৈজ্ঞানিক আবহাওয়ার মধ্যে। তাঁর এই অভিনব প্রচেষ্টা তরুণদের কল্পনারাজ্যে একটা নূতনের আশ্বাদ এনে দেবে। বইখানি সচিত্র এবং রচনাও চিত্তাকর্ষক।

“আনন্দবাজার” বলেন—গল্পের নূতনত্ব আছে—ছোট ছেলে-মেয়েদের কেন বড়দেরও ভাল লাগিবে। লেখক শিশুচিত্তে দুঃসাহসিকতার আকর্ষণের সহিত বৈজ্ঞানিক আবহাওয়ার সৃষ্টি করিতে চাহিয়াছেন। চেষ্টা সফল হইয়াছে।

“বঙ্গলক্ষ্মী” বলেন—অতি সরল ও সহজ ভাষায় শিশুদের চিত্তাকর্ষক করিয়া লিখিত হইয়াছে। কাহিনীগুলি পাঠ করিলে বালক ও বালিকাদের মন সাহসে ভরিয়া উঠে এবং বৈজ্ঞানিক জ্ঞান বৃদ্ধি পায়।

“কৈশোরক” বলেন—বৈজ্ঞানিক মাল-মশলা দিয়া ছোটদের উপযোগী গল্প লিখা এক কঠিন ব্যাপার। শৈলেন্দ্রবাবু সেই কঠিন ব্যাপারে হস্তক্ষেপ করিয়াছেন, এবং সহজ সরল শিশুবোধ্য ভাষা ও বর্ণনা ভঙ্গীর গুণে তাঁহার প্রচেষ্টা অনেকটা সাফল্য-মণ্ডিতও হইয়াছে।



# আদি মানুষ

দাম ॥০ আনা

“প্রবাসী” বলেন—সরল ভাষায় গল্পছলে সভ্যমানবের পূর্ব-পুরুষ আদিম যুগের মানবের জীবন-যাত্রার এক কাল্পনিক অথচ উজ্জ্বল চিত্র অঙ্কন করাই লেখকের উদ্দেশ্য। সে উদ্দেশ্য প্রচুর পরিমাণে সফল হইয়াছে। এই পুস্তক পাঠ করিয়া শিশুগণ আনন্দলাভ করিবে এবং সঙ্গে সঙ্গে নৃতত্ত্ব বিষয়ে নানা জ্ঞাতব্য তথ্য জানিতে পারিবে।

“কৈশোরক” বলেন—দুঃসাহসিকতার কাহিনী শিশু-মনকে স্বভাবতঃই আকর্ষণ করে। বিশেষ করিয়া কাহিনী প্রকাশের ভঙ্গীটি যদি হয় সুন্দর আর ভাষাটি হয় ঝরঝরে। সে দিক দিয়ে শৈলেন বাবুর ‘আদি মানুষ’ ক্রটি হীন। বইখানি ছোট ছোট ছেলে-মেয়েদের খুবই ভাল লাগিবে। অধিকন্তু গল্পটির মারফতে তাহারা হাজার হাজার বৎসর পূর্বের অশিক্ষিত অসভ্য আদি মানবের বাসস্থান আচার ব্যবহার খাওয়া দাওয়া সম্বন্ধে মোটামুটি তথ্য জানিতে পারিবে।

“মুগাঙ্গুর” বলেন—লেখক ভারতের একটি দুর্গম স্থানকে কেন্দ্র করিয়া উপন্যাসটি রচনা করিয়াছেন এবং বিশেষ সাফল্য-মণ্ডিত হইয়াছেন। .....বইখানি চিত্তাকর্ষক হইয়াছে। ছেলেরা ইহাতে আমোদ পাইবে..... সঙ্গে সঙ্গে তাহারা আদিম মানবের জীবন ও রীতি-নীতি সম্বন্ধেও কতকটা পরিচয় লাভ করিবে।...বইখানি কিনিয়া পড়িয়া আমোদ ও অভিজ্ঞতা লাভ করিবে।













